

# মলুয়া

## বন্দনা

আদিত্যে বন্দিয়া গাই অনাদি ঈশ্বর ।  
দেবের মধ্যে বন্দি গাই ভোলা মহেশ্বর ॥  
দেবীর মধ্যে বন্দি গাই শ্রীদুর্গা ভবানী ।  
লক্ষ্মী-সরস্বতী বন্দুম যুগল নন্দিনী ॥  
ধন-সম্পদ মিলে লক্ষ্মীরে পূজিলে ।  
সরস্বতী বন্দি গাই বিদ্যা যাতে মিলে ॥  
কার্তিক-গনেশ বন্দুম যত দেবগণ ।  
আকাশ বন্দিয়া গাই গরুড়-পবন ॥  
চন্দ্র-সূর্য্য বন্দিয়া গাই জগতের আখি ।  
সপ্ত পাতাল বন্দুম নাগান্ত<sup>১</sup> বাসুকী ॥  
মনসা দেবীরে বন্দুম আস্তিকের মাতা ।  
যাহার বিষের তেজ ডরায় বিধাতা ॥  
ভক্তমধ্যে বন্দিয়া গাই রাজা চন্দ্রধর ।  
তার সঙ্গে বন্দিয়া গাই বেউলা-লক্ষ্মীন্দর ॥

---

<sup>১</sup> নাগ, অনন্ত ?

নদীর মধ্যে বন্দিয়া গাই গঙ্গা ভাগীরথী।  
নারীর মধ্যে বন্দিয়া গাই সীতা বড় সতী ॥  
বৃক্ষের মধ্যে বন্দিয়া গাই আদ্যের তুলসী <sup>১</sup>।  
তীথের মধ্যে বন্দিয়া গাই গয়া আর কাশী ॥  
সংসার সার বন্দুম বাপ আর মায়ে।  
অভাগীর জনম হৈল যার পদছায়ে ॥  
মুনির মধ্যে বন্দিয়া গাই বাম্মীকি তপোধন।  
তরুলতা বন্দিয়া গাই স্থাবর-জঙ্গম ॥  
জল বন্দুম স্থল বন্দুম আকাশ-পাতাল।  
হর-শিরে বন্দিয়া গাই কাল-মহাকাল ॥  
তার পর বন্দিলাম শ্রীগুরুচরণ।  
সবার চরণ বন্দিয়া জানাই নিবেদন ॥  
চার কুনা <sup>২</sup> পৃথিবী বন্দিয়া করিলাম ইতি।  
সলাভ্য? <sup>৩</sup> বন্দনা গীত গায় চন্দ্রাবতী ॥

### বন্দনাগীতি সমাপ্ত

(১)

### জলপ্লাবন ও দুর্ভিক্ষ

মন্দান্যা <sup>৪</sup> আইশ্বনারে <sup>৫</sup> পানি ভাটি বাইয়া যায়। <sup>৬</sup>  
চান্দ বিনোদে ডাক্যা কইছে তার মায় ॥  
“উঠ উঠ বিনোদ আরে ডাকে তোমার মাও <sup>৭</sup>।  
চান্দ মুখ পাখলিয়া মাঠের পানে যাও ॥

---

১ দেখা যায় বৈষ্ণবের ন্যায় ধর্মপূজকেরাও তুলসীর মাহাত্ম্য স্বীকার করিয়াছেন।

২ সলাভ্য =?, ৩ কোণ, ৪ মন্দ মন্দ, ৫ আশ্বিনের,

৬ মন্দ মন্দ আশ্বিনের জল কমিতে আরম্ভ করিল, ৭ মা,

মাঠের পানে যাওরে যাদু ভালা <sup>১</sup> বান্দ আইল।  
 আগণ <sup>২</sup> মাসেতে হইব ক্ষেতে কার্তিকা সাইল <sup>৩</sup> ॥  
 মেঘ ডাকে গুরু গুরু ডাক্যা তুলে পানি। <sup>৪</sup>।  
 সকাল কইরা ক্ষেতে যাও আমার যাদুমণি ॥  
 আশমান ছাইল কালা মেঘে দেওয়ায় <sup>৫</sup> ডাকে রইয়া।  
 আর কতকাল থাকবে যাদু ঘরের মাঝে শুইয়া ॥”  
 আইল আইশ্নারে পানি উভে <sup>৬</sup> করল তল।  
 ক্ষেত কিশি <sup>৭</sup> ডুবাইয়া দিল না রইল সঞ্চল ॥  
 দেশে আইল দুর্গাপূজা জগত-জননী।  
 কুলের <sup>৮</sup> ছাল্যা <sup>৯</sup> বান্ধ্যা দিয়া পূজে দুর্গারানী ॥  
 এই মতে অশ্বিন গেল, আইল কার্তিক মাস।  
 ষরু <sup>১০</sup> শস্য ক্ষেতে নাই হইল সর্বনাশ ॥  
 লাগিয়া কার্তিকের উষ <sup>১১</sup> গায়ে হইল জ্বর।  
 বিনোদের মায়ে কান্দে হইয়া কাতর ॥  
 জোড়া মহিষ <sup>১২</sup> দিয়া মায় মানসিক করে।  
 মায়ত <sup>১৩</sup> কান্দিয়া পুত্র বুঝি মরে ॥  
 দেবের দোয়াতে <sup>১৪</sup> পুত্র পরাণে বাচিল।  
 এমতে কার্তিক গিয়া আগুণ <sup>১৫</sup> পড়িল ॥  
 উত্তরিয়া <sup>১৬</sup> শীতে পরাণ কাঁপে থরথরি।  
 ছিড়া <sup>১৭</sup> বসন দিয়া মায় অঙ্গ রাখে মুরি <sup>১৮</sup> ॥

১ ভাল, ২ অগ্রহায়ণ, ৩ শালি ধান,

৪ গুরু গুরু ডাকিয়া যেন জলকে জাগাইয়া তুলিয়াছে, ৫ মেঘ (দেওয়ায়=দেবে); রইয়া = রহিয়া রহিয়া,

৬ সম্পূর্ণরূপে, ৭ কৃষি, ৮ কোলের, ৯ ছেলে, ১০ সরু শস্য যথা সরিয়া,

১১ হিম, ১২ মহিষ, ১৩ মা, ১৪ আশীর্বাদে,

১৫ অগ্রহায়ণ, ১৬ উত্তর দিক্ হইতে আগত, ১৭ ছেঁড়া, ১৮ ঘেরিয়া।

ভালা হইল চান্দ বিনোদ দেবতার বরে।  
ঘরে নাই লক্ষ্মীর দানা <sup>1</sup> লক্ষ্মীপূজার তরে॥  
ধারের কাচি <sup>2</sup> আন্যা মায়ে তুল্যা দিল হাতে।  
“ক্ষেতে যাওরে পুত্রু আমার ধান্য যে কাটিতে॥”  
পাণ্ড গাছি বাতার <sup>3</sup> ডুগল <sup>4</sup> হাতেতে লইয়া।  
মাঠের মাঝে যায় বিনোদ বারমাসী গাইয়া॥  
আশ্বিন্যা পানিতে দেখে মাঠে নাইক ধান।  
এরে <sup>5</sup> দেখ্যা চান্দ বিনোদের কান্দিল পরাণ॥  
চান্দ বিনোদ আসি কয় মায়ের কাছে।  
“আইশনা পানিতে মাও সব শস্যি গেছে॥”  
মায়ে কান্দে পুত্র কান্দে সিরে দিয়া হাত।  
সারা বছরের লাগ্যা গেছে ঘরের ভাত॥  
টাকায় দেড় আড়া <sup>6</sup> ধান পইড়াছে আকাল <sup>7</sup>।  
কি দিয়া পালিব মায় কুলের ছাওয়াল॥  
পোষ মাসে পোষা আশ্বি <sup>8</sup> বিনোদে ডাকিয়া।  
মায় পুতে যুক্তি করে ঘরেতে বসিয়া॥  
আছিল হালের গরু বেচিয়া খাইল।

1 চাউল, 2 তীক্ষ্ণ কাস্তে, 3 পূর্ববঙ্গে “বাতা” শব্দ নানা স্থানে বিভিন্ন অর্থে ব্যবহৃত হয়। ঢাকা অঞ্চলে বেড়া আটকাইবার জন্য উহার মধ্যে যে চাঁছা বাঁশ ব্যবহৃত হয় তাহাকে বাতা বলে। কিন্তু ময়মনসিংহে ঐরূপ ব্যবহারের জন্য “বাতা” নামক একরকম স্বতন্ত্র গাছই পাওয়া যায়।

4 অগ্রভাগ। প্রথম দিন ধান কাটিবার সময়ে কৃষকেরা পাঁচটি বাতা গাছের অগ্রভাগ লইয়া ক্ষেত্রে যায়, তাহা সিন্দূর প্রভৃতি মাঙ্গলিক দ্রব্যে অনুলিপ্ত হয়। এই বাতার পাঁচটি ডুগলের সঙ্গে পাঁচটি ধানের ছড়া বাঁধা হয়, একেই কৃষকেরা লক্ষ্মীর আসন মনে করিয়া ঘরের কোণে বিশইষ্ট স্থলে তুলিয়া রাখে।

5 ইহা, 6 ৮ মণ, 7 অকাল, 8 পৌষ মাসের কুয়াসার অন্ধকার

পাঁচ গোটা ক্ষেত বিনোদ মাজনে <sup>১</sup> দিল ॥  
খেত খোলা <sup>২</sup> নাই তার, নাই হালের গরু।  
না বুনায়ে ধান কালাই না বুনায়ে সরু ॥  
ভাবিয়া চিন্তিয়া বিনোদ কোন কাম করে।  
মাঘ-ফাল্গুন দুই মাস কাটাইল ঘরে ॥  
চৈত-বৈশাখ মাস গেল এই মতে।  
জ্যৈষ্ঠ মাসেতে বিনোদ পিঁজরা <sup>৩</sup> লইল হাতে ॥  
মায়েরে ডাকিয়া কয় মধুরস বাণী।  
“কুড়া শীগারে <sup>৪</sup> যাইতে বিদায় দেও মা জননী ॥”  
ঘুম থাক্যা উঠ্যা বিনোদ মায়েরে কহিল।  
কুড়া শীগারে যাইতে বিদায় মাগিল ॥  
টিক্কা না জ্বালাইয়া বিনোদ হুঙ্কায় ভরে পানি।  
ঘরে নাই বাসি ভাত কালা মুখখানি ॥  
ঘরে নাই খুদের অন্ন কি রাখিব মায়।  
উপাস করিয়া পুত্র শীগারেতে যায় ॥  
মায়ের আক্ষির জলে বুক যায়রে ভাসি।  
ঘরতনে <sup>৫</sup> বাইর অইল বিনোদ বিলাতের <sup>৬</sup> উপাসী ॥  
জ্যৈষ্ঠ মাসের রবির জ্বালা পবনের নাই বাও <sup>৭</sup>।  
পুত্ররে শীগারে দিয়া পাগল হইল মাও ॥

---

১ মহাজনকে, ২ ক্ষেত শব্দের সঙ্গে খোলা শব্দ অনেক সময় একত্র ব্যবহরিত হয়, ইহার বিশেষ কোন অর্থ আছে বলিয়া বোধ হয় না।

৩ পিঞ্জর, পাখী রাখিবার খাঁচা, ৪ শিকারে, ৫ ঘর হইতে, ৬ বিদেশ-গমনোদ্যত, ৭ পবনের নাই বাও = পবন দেবতা বাতাস দিচ্ছেন না।

(২)

## পথে

আগারাঙ্গ্যা<sup>১</sup> সাইলের খেত পাক্যা<sup>২</sup> ভূমে পড়ে।  
পথে আছে বইনের বাড়ী যাইব মনে করে ॥  
“মায়ের পেটের বইন গো তুমি শুন আমার বাণী।  
শীগারে যাইতে শীঘ্র বিদায় কর তুমি ॥”  
ঘরে ছিল সাচি পান চুন খয়ের দিয়া।  
ভাইয়ের লাগ্যা বইনে দিল পান বানাইয়া ॥  
উত্তম সাইলের চিড়া গিঠেতে<sup>৩</sup> বান্ধিল।  
ঘরে ছিল শবরী কলা তাও সঙ্গে দিল ॥  
কিছু কিছু তামুক আর টিক্কা দিল সাথে।  
মেলা কইরা<sup>৪</sup> বিনোদ বাহির হইল পথে ॥  
যতদূর দেখা গেল বইনে রইল চাইয়া।  
শীগারে চলিল বিনোদ পালা<sup>৫</sup> কুড়া লইয়া ॥  
কুড়ায় ডাকে ঘন ঘন আষার মাস আসে।  
জমীনে পড়িল ছায়া মেঘ আসমানে ভাসে ॥  
গুরু গুরু দেওয়ায় বাকে জিল্কি<sup>৬</sup> ঠাডা<sup>৭</sup> পড়ে।  
অভাগী জননী দেখ ঘরে পুইরা<sup>৮</sup> মরে ॥  
আইল আষাঢ় মাস জলের বাড়ে ফেনা।  
কুড়ার ডাকেতে শুনে বর্ষার নমুনা ॥<sup>৯</sup>  
মায়ে বইনে না দেখিল বুকে রইল শেল।  
কুড়া লইয়া চান্দ বিনোদ কোন বা দেশে গেল ॥  
একলা থাকিয়া ঘরে কান্দে তার মায়।  
কি জানি যাদুরে মোর সাপে বাঘে খায় ॥

---

১ অগ্রভাগ যাহার পাকিয়া রাঙ্গা হইয়াছে, ২ পাকিয়া, ৩ গিঠে, গেড়ে দিয়া কাপড়ে বান্ধিল, ৪ যাত্রা করিয়া, ৫ পোষা, ৬ বিদ্যুৎ, ৭ বজ্র, ৮ পুড়িয়া(দুষ্টিভায়), ৯ কুড়া পাখীর ডাকে বর্ষা আসিতেছে আভাসে বুঝা যায়।

(৩)  
পূর্বরাগ

কোন দেশেতে গেল বিনোদ শুন বিবরণ।  
আড়ালিয়া গেরামে <sup>১</sup> যাইয়া দিল দরশন ॥  
গাঁয়ের পাছে আন্ধ্যাপুখুর <sup>২</sup> ঝাড়জঙলে ঘেরা।  
চাইর <sup>৩</sup> দিগে কলাগাছ মান্দার গাছের বেড়া ॥  
জলে যাইতে এক পন্থ আনাগুনা <sup>৪</sup> করে।  
জলের শোভা দেখে বিনোদ পুষ্কর্নির পাড়ে ॥  
ঘাটেতে কদম গাছে ফুট্যা রইছে ফুল।  
কড়ারে রাখিয়া বিনোদ রইল তার তল <sup>৫</sup> ॥  
জৈঠ <sup>৬</sup> মাসের ছোট রাইত ঘুমের আরি <sup>৭</sup> না মিটে।  
কদমতলায় শুইয়া বিনোদ দিনের দুপুর কাটে ॥  
ঘুমাইতে ঘুমাইতে বিনোদ অইল সন্ধ্যাবেলা।  
“ঘাটের পারে নিদ্রা যাও কে তুমি একেলা ॥”  
সাত ভাইয়ের বইন মলুয়া জল ভরিতে আসে।  
সন্ধ্যাবেলা নাদর শুইয়া একলা জলের ঘাটে ॥  
কাঁদের কলসী ভূমিত থইয়া <sup>৮</sup> মলুয়া সুন্দরী।  
লামিল <sup>৯</sup> জলের ঘাটে অতি তরাতরি ॥  
একবার লামে কন্যা আরবার চায়।  
সুন্দর পুরুষ এক অঘুরে <sup>১০</sup> ঘুমায় ॥

---

১ গ্রাম, ২ যে পুকুর নানারূপ গুল্মলতায় আবৃত, ৩ চারি, ৪ পথিক,  
৫ চলিত কথায় সে অঞ্চলে “তল” শব্দের “তুল” উচ্চারণও  
শোনা যায়। এই সকল গ্রাম্য কবির কবিতা এইজন্য উচ্চারণ  
হিসাবে দোষযুক্ত হয় নাই। ফুলের সঙ্গে তুল মিলিয়া যায়।  
৬ জৈঠ, ৭ জের, ইচ্ছা, ৮ রাখিয়া, ৯ নামিল, ১০ একান্ত অভিভূত  
হইয়া।

সন্ধ্যা মিলাইয়া যায় রবি পশ্চিম পাটে <sup>১</sup>।  
তবু না ভাঙিল নিদ্রা একলা জলের ঘাটে ॥  
“রাত্রি নিশাকালে যদি ভাঙে নিদ্রা তার।  
ভিন দেশী পুরুষ বল যাইবে কোথায় আর ॥  
বাড়ী নাই ঘররে নাই নাই বাপ-মাই।  
রাত্রি পোষাইতে কেবা দিব একটু ঠাই ॥  
কোথা হইতে আইল নাগর কোথায় বাড়ীঘর।  
কুলের কুমারী আমি কেমনে পাই উত্তর ॥  
উঠ উঠ নাগর” কন্যা ডাকে মনে মনে।  
কি জানি মনের ডাক সেও নাগর শুনে ॥  
“ভিন দেশী পুরুষ এই লাজে মাথা কাটে।  
কেমন কইরা সন্ধ্যাবেলা একলা রইবাম ঘাটে ॥  
মনে লয় পুরুষে আমি জাগাই ডাকিয়া।  
বাপের বাড়ীর পথ আমি তারে দেই দেখাইয়া ॥  
আন্ধাইর রাইতে কোথায় যাইব পথ না চিনিলে ॥  
এমন সময় চক্ষে বিধি কাল নিদ্রা দিলে ॥  
উঠ উঠ ভিন্ন পুরুষ তুমি কত নিদ্রা যাও।  
যার বুকের ধন তুমি তার কাছে যাও ॥”  
কলশী লইয়া কন্যা জলে দিল ঢেউ।  
“এই ঘুম ভাঙিতে পারে সঞ্জে নাই মোর কেউ ॥  
আইত <sup>২</sup> যদি ভাইয়ের বউ সঞ্জেতে আমার।  
কোন মতে কাল ঘুম ভাঙিতাম যে তার ॥  
মাও যদি সঞ্জে আইত কি করিতাম তারে।  
মায়েরে দিয়া কইয়া বুল্যা <sup>৩</sup> লইয়া যাইতাম ঘরে ॥  
একলা অবলা আমি কুলমানের ভয়।  
পন্থ-হারা ভিন পুরুষের দুঃখ নাহি সয় ॥”

---

১ আসনে, ২ আসিত, ৩ বলে কয়ে।



এই না ভাবিয়া কন্যা কোন কাম করিল।  
কাছে আছিল শুধা <sup>১</sup> কলস টানিয়া আনিল ॥  
“শুনরে পিতলের কলসী কইয়া বুঝাই তরে।  
ডাক দিয়া জাগাও তুমি ভিন্ পুরুষেরে ॥”  
এত বলি কলসী কন্যা জলেতে ভরিল।  
জলভরণের শব্দে বিনোদ জাগিয়া উঠিল ॥  
জলভরণের শব্দে কুড়া ঘন ডাক ছাড়ে।  
জাগিয়া না চান্দ বিনোদ কোন কাম করে ॥  
দেখিল সুন্দর কন্যা জল লইয়া যায়।  
মেঘের বরণ কন্যার গায়েতে লুটায় ॥  
এইত কেশ না কন্যার লাখ টাকার মূল।  
শুকনা কাননে যেন মহুয়ার ফুল ॥  
ডাগল <sup>২</sup> দীঘল আখি যার পানে চায়।  
একবার দেখলে তারে পাগল হইয়া যায় ॥  
“এম সুন্দর কন্যা না দেখি কখন।  
কার ঘরের উজল বাতি চুরি করল মন ॥  
জাগিয়া দেখ্যাছি কিবা নিশির স্বপন।  
কার ঘরের সুন্দর নারী কার পরাণের ধন ॥  
জলের না পদ্মফুল শুকনায় ফুটে রইয়া।  
আসমানের তারা ফুটে মণ্ডিতে ভরিয়া ॥ <sup>৩</sup>  
শুন শুন কুড়া আরে কহি যে তোমারে।  
পরিচয়-কথা কন্যার আন্যা দেও আমারে ॥  
কার বা নারী কার বা কন্যা কোথায় বাড়ীঘর।  
উইরে <sup>৪</sup> যাওরে বনের কুড়া আন গিয়া উত্তর ॥

---

<sup>১</sup> শূন্য, <sup>২</sup> ডাগর, বড়, <sup>৩</sup> জলের পদ্ম স্থলে ফুটিয়ে রহিয়াছে।  
মণ্ডিতে ভরিয়া, আকাশের তারা পৃথিবী ফুটিয়ে উঠিয়াছে। <sup>৪</sup>  
উড়িয়া।

শুন চন্দ্রমুখী কন্যা কহি যে তোমারে ।  
একবার ফিরিয়ে চাও দেখি যে তোমারে ॥  
কি ক্ষণে আইলাম আমি কুড়া না <sup>১</sup> শীগারে ।  
পরাণ রাখিয়া গেলাম এই না জলের ঘাটে ॥  
একবার চাওলো কন্যা মুখ ফিরাইয়া ।  
আর একবার দেখি আমি আপনা ভুলিয়া ॥  
অর্ধেক যৌবন কন্যার বিয়ার নাই সে বাকী ।  
পরের নারী দেখ্যা কেন মজে আমার আখি ॥  
বিয়া যদি নাহি হয় কি করিবাম তায় ।  
পরের ঘরের কন্যা না দেখি উপায় ॥  
উইরে যাওরে বনের কুড়া কইও মায়ের আগে ।  
তোমার না চান্দ বিনোদ খাইছে জঙ্গলার বাঘে ॥  
উইরে যাওরে বনের কুড়া কইও বইনের ঠাই ।  
মইরা গেছে চান্দ বিনোদ আরত বাচ্যা <sup>২</sup> নাই ॥  
উইরা যাওরে বনের কুড়া কন্যারে জানাও ।  
আমার পরাণের কথা যথায় লাগাল পাও ॥”  
ভিন দেশী পুরুষ দেখি চান্দের মতন ।  
লাজ-রক্ত হইল কন্যার পরথম যৌবন ॥  
কলসী ভরিয়া কন্যা ঘরেতে ফিরিল ।  
কুড়া লইয়া চান্দ বিনোদ বইনের বাড়ী গেল ॥  
আশ্বিনে পূবের মেঘ পশ্চিমে ভাস্যা যায় ।  
ঘরে থাক্যা কান্দা মরে অভাগিনী মায় ॥

---

<sup>১</sup> ‘না’ শব্দের অর্থ নাই, <sup>২</sup> বাঁচিয়া ।

(৪)

## কৈফিয়ৎ তলপ এবং মলুয়ার জবাব

পঞ্চ ভাইয়ে বৌয়ে ডাক্যা<sup>১</sup> কয় “ননদিনী।  
সন্ধ্যাকালে জলের ঘাটে একলা কেন তুমি ॥  
আউলা ঝাউলা<sup>২</sup> অঞ্জের বসন মাথায় কেশ খুলা<sup>৩</sup>।  
আজি কেন জলের ঘাটে গিয়াছিল একলা ॥  
আধা কলশী ভরা দেখি আধা কলসী খালি।  
আইজ যে দেখি ফোটা ফুল কাইল দেখ্যাছি কলি ॥  
কি হইয়াছে জলের ঘাটে সত্য করি বল।  
না ভাড়াইও ননদিনী না করিও ছল ॥  
আইজ সকালে জলের ঘাটে মোদের সঙ্গে চল।  
সঙ্গে কইরা কলসী লও ভইরা আনতে জল ॥  
ঘরে আছে গন্ধতৈল আবের কাকই<sup>৪</sup> দিয়া।  
রাতির আইলা<sup>৫</sup> চাচর<sup>৬</sup> কেশ দিবাম বান্ধিয়া ॥  
তরে<sup>৭</sup> লইয়া ননদিনী আমরা যাইবাম জলে।  
মনের কথা কইবাম গিয়া ঐ না জলের ঘাটে ॥  
বিয়ার বছর হইল, না আইল বর।  
এমন যে কন্যা আইজ রইল বাপের ঘর ॥  
পরথম যৌবন কন্যা পরমসুন্দরী।  
তরে দেখ্যা ননদিনী আমরা জ্বল্যা মরি ॥”  
মলুয়া কইছে “বউ মোর বাক্য ধর।  
একলা যাইতে জলের ঘাটে কেন বা মানা কর ॥”  
পাচ ভাইয়ের বধু কয় “একলা যাইয়ে চান্দে।  
কি জানি চণ্ডালের<sup>৮</sup> কাছে ফালায় তারে ফান্দে ॥”

---

১ ডাকিয়া, ২ এলোমেলো, ৩ খোলা, ৪ অভ-খচিত চিরুণী, ৫  
এলায়িত, এলো। রাতির ... বান্ধিয়া = রাত্রিকালে তোমার  
কুণ্ঠিত কেশ এলাইয়া গিয়াছে, তাহা বান্ধিয়া দিব।

৬ কুণ্ঠিত, ৭ তোরে, ৮ রাহু।

“কালিকার রাত্রি আমার গেছে দারুন জ্বরে।  
বেদনা হইছে বধু আমার পেটের কামরে ॥  
তোমরা সবে জলে যাও না যাইব আমি।”  
পাচ ভাইয়ের বধু তবে করে কানাকানি ॥  
কানাকানি করি তারা জলের ঘাটে গেল।  
শয়নমন্দিরে কন্যা পরবেশ করিল ॥

(৫)

### মলুয়ার পরিচয়

জাতিতে হালুয়া দাস<sup>১</sup> গাঁয়ের<sup>২</sup> মরল<sup>৩</sup>।  
মলুয়ার বাপ হয় নাম হীরাধর ॥  
পাঁচ পুত্র হয় তার অতি ভাগ্যবান।  
সরু সশ্যে ভরা টাইল<sup>৪</sup> গোলা ভরা ধান ॥  
ঘরে আছে দুধবিয়ানী<sup>৫</sup> দশ গোটা গাই।  
হালের বলদ আছে তার কোন দুঃখ নাই ॥  
বাইস আড়া<sup>৬</sup> জমীন তার সাইল আর আমন।  
ধনে পুত্রে বর তারে দিছে দেবগণ ॥  
দোল-দুর্গোৎসব তার পরব-পার্বণ।  
বাপ-মায়ের শ্রাদ্ধে করে ব্রাহ্মণ-ভোজন ॥

---

১ হেলে দাস (কৈবর্ত), ২ গ্রামের, ৩ মোড়ল, ৪ ধান-সরিষা প্রভৃতি  
রাখিবার জন্য বাঁশের তৈয়ারী চতুষ্কোণ পাত্র, ৫ দুগ্ধবতী, ৬  
প্রায় আঠাশ বিঘা।

বার না বচ্ছরের কন্যা পরমসুন্দরী।  
না হইল বিয়া কন্যার চিন্তা মনে ভারি ॥  
বাপ-মায় চায় বর রাজার সমান।  
একমাত্র কন্যা মাও-বাপের পরাণ ॥  
কত ঘর আইল গেল পছন্দ না হয়।  
ভালা ঘরে বিয়া দেওয়া হইল সংশয় ॥

(৬)

### স্নানের ঘাটে

শয্যাতে শুইয়া কন্যা ভাবে মনে মন।  
“কোথায় তনে <sup>১</sup> আইল পুরুষ চান্দের মতন ॥  
কুড়া শীগার কইরা ফিরে বনে বনে।  
আজি যে জলের ঘাটে দেখলাম কিবা ক্ষণে ॥  
কালি রাত্রি পোয়াইল কার বাড়ীতে থাকি।  
কোথায় জানি রাখল তার সঙ্গের কুড়াপাখী ॥  
আমি যদি হইতাম কুড়া থাকতাম তার সনে।  
তার সঙ্গে থাক্যা আমি ঘুরতাম বনে বনে ॥  
আসমানে থাকিয়া দেওয়া ডাকছ তুমি কারে।  
ঐনা আষাঢ়ের পানি বইছে শত ধারে ॥  
গাং ভাসে নদী ভাসে শুকনায় না ধরে পানি।  
এমন রাতে কোথায় গেল কিছুই না জানি ॥  
অতিথ বলিয়া যদি আইত আমার বাড়ী।  
বাপেরে কহিয়া আমি বইতে <sup>২</sup> দিতাম পিড়ি ॥  
শুইতে দিতাম শীতল পাটী বাটাভরা পান।  
আইত <sup>৩</sup> যদি সোণার অতিথ যৌবন করতাম দান ॥”

---

<sup>১</sup> হইতে; ‘স্থানাৎ’ শব্দের অপভ্রংশ, <sup>২</sup> বসিতে, <sup>৩</sup> আসিত।

দুপুরবেলা গেল কন্যার ভাবিয়া চিন্তিয়া ।  
বিয়াল<sup>১</sup> বেলা গেল কন্যার বিছানাতে শুইয়া ॥  
সন্ধ্যাকাল আইলে কন্যা কোন কাম করে ।  
পিতলা কলসী কন্যা লইল কাঁকের উপরে ॥  
কলসী লইয়া কন্যা জলের ঘাটে যায় ।  
পাশ্বে ভাইয়ের বউয়েরে কন্যা কিছু না জানায় ॥  
মেঘ আরা<sup>২</sup> আষড়ের রইদ<sup>৩</sup> গায়ে বড় জ্বালা  
ছান<sup>৪</sup> করিতে জলের ঘাটে যায় সে একেলা ॥  
কিসের ছান কিসের পানি কিসের জল ভরা ।  
দুইয়ের প্রাণে টান পইড়াছে এমন প্রেমের ধারা ॥  
একলা সন্ধ্যাকালে কন্যা জলের ঘাটে যায় ।  
চান্দ বিনোদ শুইয়া আছে কদমতলায় ॥  
শিয়রে থাকিয়া কুড়া ডাকে ঘন ঘন ।  
কুড়ার ডাকেতে বিনোদ মেলিল নয়ন ॥  
আখি না মেলিয়া বিনোদ ঘাটের পানে চায় ।  
জল ভরে সুন্দরী কন্যা দেখিবারে পায় ॥

### চাঁদ বিনোদ

“কুড়া শীগার কইরা আমি ফিরি বনে বনে ।  
আমার যত মনের দুঃখ কেউত না শুনে ॥  
কে তুমি সুন্দরী কন্যা নিত্যি ভর পানি ।  
রইয়া শুন আমার কথা কিছু কইবাম<sup>৫</sup> আমি ॥

---

১ বিকাল, ২ মেঘের অন্তরালে, ৩ রোদ, ৪ স্নান, ৫ কহিব ।

কুড়া শীগার করি আমি চান্দ বিনোদ নাম।  
পরিচয়-কথা মোর সত্য কহিলাম ॥  
কার কন্যা কোথায় বাড়ী কিবা নাম ধর।  
আমি চাই পরিচয় দেও যে উত্তর ॥  
কলসী বুড়াইয়া <sup>১</sup> কন্যা জলে দিছ ঢেউ।  
সন্ধ্যাবেলা জলের ঘাটে সঞ্চে নাই আর কেউ ॥  
কাইল গেছে আশে পাশে আইজ রইলাম বইয়া <sup>২</sup>।  
মনের আগুন নিবাও কন্যা পরিচয় কইয়া ॥  
বিয়া যদি হইয়া থাকে হও পরের নারী।  
সেও কথা কও কন্যা আজি সত্য করি ॥  
তোমার পানে চাইয়া কন্যা আমি যাইবাম ফিরে  
আর না আসিবাম কন্যা কুড়া-শীগারে ॥”

### মলুয়া

“বাপের নাম হিরাধর অসমা মোর মাও <sup>৩</sup>।  
কালী দেখলাম জলের ঘাটে শূইয়া নিদ্রা যাও ॥  
ভিন দেশী পুরুষ তুমি কি কহি তোমারে।  
অতিথ হইয়া আজি থাক আমার বাপের ঘরে ॥  
কুড়া লইয়া তুমি থাক বনে বনে।  
কেমনে কাটাও নিশি এইমতে কাননে ॥  
বনে আছে বাঘ-ভালুক তোমার ভয় নাই।  
এমন কইরা কেমনে তুমি ফির ঠাই ঠাই ॥  
আন্ধুয়া পুস্কুনির পাড় কালনাগের বাসা।  
একবার ডংশিলে <sup>৪</sup> যাইব <sup>৫</sup> পরাণের আশা ॥

---

১ ডুবাইয়া, ২ বসিয়া, অপেক্ষা করিয়া, ৩ মা, ৪ দংশন করিলে,  
৫ যাবে।

সাধুমন্ত<sup>১</sup> বাপ আমার মাও যে সৃজন।  
ঘরেতে আমার আছে ভাই পঞ্চ জন ॥  
পঞ্চ ভাইয়ের বউ আছে ইষ্টকুটুম করি।  
আজি নিশি অতিথ হইয়া রইবা আমার বাড়ী ॥  
এই পথে যাইতে আজি তোমায় করি মানা।  
সামনে আছে গেরামের<sup>২</sup> পথ লোকের আনাগুনা ॥  
সেই পথ ধইরা তুমি মেলা নাই সে কর।<sup>৩</sup>  
এই পথে যাইতে দেখবা বার-দুয়াইরা ঘর<sup>৪</sup> ॥  
সামনে আছে পুঙ্কুনি সানে বান্ধা ঘাট।  
পূব মুখ্যা<sup>৫</sup> বাড়িখানি আয়নার কপাট ॥  
আগে পাছে বাগ-বাগিচা আছে সারি সারি।  
পারাপশ্বির লোকে<sup>৬</sup> কয় গাও মরলের<sup>৭</sup> বাড়ী ॥  
দুঃখ কেনে করবা তুমি আজি নিশা বনে।  
শীতল পাটী পাত্যা দিবাম তোমার বিছানে ॥  
পাঁচ ভাইয়ের বউয়ে রান্বে ছত্রিশ বেনুন।  
আজি নিশি থাক্যা তুমি করিও ভোজন ॥”  
এইত বলিয়া কন্যা জল লইয়া যায়।  
কুড়া লইয়া চান্দ বিনোদ ভিন্ন পথে যায় ॥

---

১ সজ্জন, ভাল লোক, ২ গ্রামের, ৩ সে পথ তুমি যেও; নাই  
শব্দ নিরর্থ, ৪ বহির্দ্বারবিশিষ্ট ঘর, ৫ পূর্বমুখী, ৬ পাড়াপরসীরা,  
৭ গ্রামের মোড়লের, ৮ রান্ধিবে।



(৭)

## অতিথির অভ্যর্থনা

সন্ধ্যাকালে অতিথি আইল ভিন দেশে ঘর।  
পাঁচ পুত্রে ডাক্যা <sup>১</sup> কয় সাধু হীরাধর ॥  
লোটা ভইরা শীতল জল দিল খরম পানি।  
পাঁচ ভাইয়ের বউয়ে রান্ধে পরম <sup>২</sup> রান্ধুনি ॥  
মানকচু ভাজা আর অম্বল চালিতার।  
মাছের সরুয়া <sup>৩</sup> রান্ধে জিরার সম্বার ॥  
কাইটা <sup>৪</sup> লইছে কই মাছ চরচরি খারা।  
ভালা কইরে রান্ধে বেনুন দিয়া কালাজিরা ॥  
একে একে রান্ধে সব বেনুন ছত্রিশ জাতি।  
শুকনা মাছ পুইড়া <sup>৫</sup> রান্ধে আগল বেসাতি ॥  
পাঁচ ভাইয়ের সঙ্গে বিনোদ পিড়িত বস্যা <sup>৬</sup> খায়।  
এমন ভোজন বিনোদ জন্মে নাই সে খায় ॥  
শুকত <sup>৭</sup> খাইল বেনুন খাইল আর ভাজা বরা।  
পুলি পিঠা খাইল বিনোদ দুধের শিস্যায় ভরা <sup>৮</sup> ॥  
পাত পিঠা বরা পিঠা চিত <sup>৯</sup> চন্দ্রপুলি।  
পোয়া চই <sup>১০</sup> খাইল কত রসে ঢলাঢলি ॥

---

১ ডাকিয়া, ২ অত্যন্ত নিপুণ, ৩ ঝোলযুক্ত ব্যঞ্জন, ৪ কাটিয়া, ৫ পুড়িয়া, ৬ কাষ্ঠাসনে বসিয়া, ৭ শুকত, ৮ দুধের শিষে ভরা, ক্ষীর দিয়া ভরা, ৯ চিতই; আস্কে, ১০ মাল্পো, চই = একরূপ ঝাল শাক।

আচাইয়া চান্দ বিনোদ উঠিল তখন।  
বার-দুয়ারিয়া ঘরে গিয়া করিল শয়ন ॥  
বাটাভরা সাচি পান লং এলাচি দিয়া।  
পাঁচ ভাইয়ের বউ দিছে পান সাজাইয়া ॥  
শুইতে দিছে শীতল পাটী উত্তম বিছান।  
বাতাস করিতে দিছে আবের পাখাখান ॥  
এইমতে শুইয়া বিনোদ সুখে নিদ্রা যায়।  
পরভাতে উঠিয়া বিনোদ বিদায় যে চায় ॥  
পল্লম করিল বিনোদ হীরাধরের পায়।  
পঞ্চ ভাইয়ের বিনোদ পল্লম জানায় ॥  
ঘন তনে বাহির হইয়া বিনোদ পথে দিল মেলা।  
সুন্দরী মলুয়া ঘরে রইল একেলা ॥

(৮)

### বিবাহের প্রস্তাব

বইনের কাছে গিয়া বিনোদ বইনের আগে কয়।  
শীগারে গেছিলাম যত কইল সমুদয় ॥  
আদিগুরি <sup>১</sup> বির্তান্ত সব বইনেরে শুনায়।  
বিয়ার কথা কইতে বিনোদ মনে লজ্জা পায় ॥  
বইনেত বুঝিল তবে ভাইএর বেদন।  
মায়ের কাছে যাইতে বিনোদ করিল গমন ॥  
মায়ের কাছে কইতে বিনোদ মনে লজ্জা পায়।  
কেমন কইরা কইব কথা না দেখি উপায় ॥  
এক দুই তিন করি আষাঢ় মাস যায়।  
সাইর সরসিরে <sup>২</sup> বিনোদ বেদনা জানায় ॥  
একে একে যত কথা উঠল মায়ের কানে।  
ঘটক পাঠাইল পরে বিয়ার সন্ধানে ॥

---

<sup>১</sup> আগাগোড়া, <sup>২</sup> সঙ্গীদের।

এগার উতরিয়া কন্যা বারয় দিল পাও ।  
দেখিয়া চিন্তিত হইল তার বাপ-মাও ॥  
ঘুরা <sup>1</sup> না যায় অঞ্জের বসন করে টানাটানি ।  
তারে দেখ্যা পাড়ার লোকে করে কানাকানি ॥  
কানাকানি করে কেউ করে বলাবলি ।  
দিনে দিনে ফোটে কন্যার যৌবনের কলি ॥  
আষাঢ় মাস হীরাধরের আশার আশে যায় ।  
বিয়া নাই সে হইল কন্যার কি করি উপায় ॥  
শায়ন <sup>2</sup> মাসে বিয়া দিতে দেশের মানা আছে ।  
এই মাসে বিয়া দিয়া বেউলা <sup>3</sup> রাড়ি <sup>4</sup> হইছে ॥  
ভাদ্র মাসে শাস্ত্রমতে দেবকার্য্য মানা ।  
এই মাসে না হইল বিয়া কেবল আনাগুনা ॥  
আশ্বিন মাসেতে দেখে দুর্গাপূজা দেশে ।  
এও মাস দেল বাপের পূজার আন্দেসে <sup>5</sup> ॥  
আর্তীক মাসেতে পাইব কার্তীকসমান বর ।  
মন নাহি উঠে বাপের আইল যত ঘর ॥  
আগণ <sup>6</sup> মাসে রাঙা ধান জমীনে ফলে সোনা ।  
রাঙা জামাই ঘরে আনতে বাপের হইল মানা ॥  
পৌষ মাসে পোষা আশ্বি দেশাচারে দোষ ।  
এই মাস গেলে হইব বিয়ার সন্তুষ ॥  
মাঘ মাসে করমি <sup>7</sup> আইল হীরাধরের বাড়ী ।  
একে একে দেখে বাপে সম্বন্ধ বিচারি ॥  
চম্পাতলার সোনাধর এক পুত্র তার ।  
দেখিতে সুন্দর পুত্র কার্তীক কুমার ॥

---

1 ঘেরিয়া ফেলা, 2 শ্রাবণ, 3 বেহুলা, 4 রাড়ী; বিধবা, 5  
আমোদপ্রমোদে, 6 অগ্রহায়ণ, 7 ঘটক

আড়ায়<sup>১</sup> পুড়ায় তার আছে জমীন।  
 হীরাধর কয় বংশে সেও অকুলিন ॥  
 আর এক করমি আইল দীঘলহাটী হইতে।  
 ধনে জনে সেও ভাল সকল কথা কইতে<sup>২</sup> ॥  
 ঘরের ভাত খায় সে যে গোয়াইলভরা গরু ॥  
 কাঠাতে মাপিয়া তোলে ধান-চাউল সরু ॥  
 বাপের নাই সে উঠে মন হইল বিষম লেঠা।  
 ঘরবর পছন্দ হইল বংশে আছে খুটা<sup>৩</sup> ॥  
 উত্তরে সুসুঙ হইতে আইল আরও ঘর।  
 অবস্থা-বেবস্থা তার অতিশয় সুন্দর ॥  
 ধানে চাউলে মহাজন চাইর পুত্র তার।  
 এক এক পুত্র যেমন তার দেব অবতার ॥  
 ঘাটে বান্ধা দৌড়ের নাও<sup>৪</sup> পছন্দ বাহার।  
 লড়াই করিতে আছে চাইর গোটা ঘাঁড়<sup>৫</sup> ॥  
 ভাত ফালাইয়া ভাত খায় চিন্তা-ভাবনা নাই।  
 মহারোগীর বংশ<sup>৬</sup> বল্যা কন্যা দিতে নাই ॥  
 এমন কালে করমি গেল সম্বন্ধ করিতে।  
 চান্দ বিনোদের বিয়া কৈল<sup>৭</sup> বিধিমতে ॥  
 কার পুত্র কোথায় বাড়ী সকল জানিয়া।  
 বাপে ভাবে হেথায় কন্যা দিব কিনা বিয়া ॥  
 বরত পছন্দ হয় কার্তিক কুমার।  
 বংশেতে কুলিন সেই যত হালুয়ার ॥  
 হালুয়া গোষ্ঠির মধ্যে বড় বাপের বেটা।  
 বংশেতে কুলিন সেই নাই কোন খোটা ॥  
 এক চিন্তা করে বাপে শিরে হাত দিয়া।  
 “কেমন কইরা এমন ঘরে কন্যা দিবাম বিয়া ॥

---

১ ১৬ কাঠায় এক আড়া, ২ সকল দিক দিয়া দেখিলে, ৩ খোটা;  
 নিন্দা, ৪ বাইছ খেলার নৌকা, (racing boats), ৫ fighting bulls  
 , ৬ বংশে কাহারও কুষ্ঠব্যাপী ছিল, ৭ কহিল, প্রস্তাব করিল।

এক কাঠা ভুই নাই খলা <sup>১</sup> পাতিবারে।  
কেমন কইরা বিয়া দিবাম কন্যা এই ঘরে ॥  
একখানি ভাঙ্গা ঘর চালে নাই ছানি।  
কেমনে থাইব কন্যা উচ্ছিলার <sup>২</sup> পানি ॥  
বাপের দুলাল কন্যা দুঃখ নাই জানে।  
পাঁচ ভাইয়ের বইন এত না সইব পরাণে ॥  
একমুষ্টি ধান নাই লক্ষ্মীপূজার তরে।  
কি থাইয়া থাকব কন্যা দরিদ্রের ঘরে ॥  
পাটের শাড়ী পিন্দিয়া কন্যা সুখ নাই পায়।  
হেন ঘরে কণ্যা দিতে মন না জুয়ায় <sup>৪</sup>।”  
করমি ফিরিয়া গেল সম্বন্ধ না হয়।  
চান্দ বিনোদের মায় ডাক্যা সবে কয় ॥  
এহা শুন্যা বিনোদের মা চিন্তিত হইল।  
পুত্রের রাখিতে মন দৈবে নাই দিল ॥  
আঁচি আঁচি <sup>৫</sup> সকল কথা চান্দ বিনোদ শুনে।  
বৈদেশে যাইতে বিনোদ দড় করল মনে ॥

(৯)

### ভাগ্যচক্রের পরিবর্তন

ঘুম থাক্যা উঠ্যা বিনোদ মায়ের আগে কয়।  
“গিরে <sup>৬</sup> বস্যা উচিত মা থাকতে নাই হয় ॥  
কামাই রোজগার নাই ঘরে নাই ভাত।  
এমন করিয়া কেমনে রইব কুলজাত ॥  
বিদায় দেও মা জননী বলি তোমার আগে।  
বৈদেশে যাইতে তোমার পুত্র বিদায় যে মাগে ॥”

---

<sup>১</sup> খোল; ধান শুকাইবার স্থান, <sup>২</sup> ঘরের চাল হইতে যে জল পড়ে,  
<sup>৩</sup> পরিধান করিয়া, <sup>৪</sup> যোগ্য হয়; যোগ্য মনে হয় না, <sup>৫</sup> ইঙ্গিত  
দ্বারা, <sup>৬</sup> গৃহে

ঘরে আছিল পানিপাত বাইরা <sup>১</sup> দিল মায়।  
কাচালঙ্কা দিয়া বিনোদ কিছু কিছু খায় ॥  
মায়ের পায়ের ধূলা বিনোদ তুল্যা লইল শিরে।  
বৈদেশে যাইতে বিনোদ পথে মেলা করে ॥  
কুড়া শীগারী বিনোদ পিজরা লইল হাতে।  
এক বারে উতরিল সরাইয়ের <sup>২</sup> পথে ॥  
বৈদেশেতে যায় যাদু যদুর দেখা যায়।  
পিছন থাক্যা চাইয়া দেখে অভাগিনী মায় ॥  
বাঁশের ঝাড় বনজঙ্গলে পুতের পিঠে পড়ে।  
আখির পানি মুছ্যা মায় ফির্যা আইল ঘরে ॥  
এক মাস দুই মাস তিন মাস যায়।  
ছয় সাত আট করি বছর গোয়ায় ॥  
“কি কর বিনোদের মাও কি কর বসিয়া।  
তোমার পুত্র বিনোদ আইল দেখ বাইর হইয়া ॥  
আইসাছে তোমার যাদু দুই আখির তারা।”  
ডাক শুনিয়া পাগল মাও পথে হইল খাড়া ॥  
দেখিয়া পুত্রের মুখ এক বছর পরে।  
অভাগী দুঃখিনী মায়ের দুই নয়ান ঝুরে ॥  
কুড়া শীগার কইরা বিনোদ পাইল জমীন বাড়ী।  
ইনাম বকশিস্ পাইল কত কইতে নাহি পারি ॥  
রাজ্যের রাজা দেওয়ান সাহেব সদয় হইল তারে।  
কুড়ি আড়া জমীন দেওয়ান লেখ্যা দিল তারে ॥  
কামলার <sup>৩</sup> কাম বিনোদ তাও ভালা জানে।  
ভালা কইরা বাঞ্চে বাড়ী সূত্যা নদীর কানে <sup>৪</sup> ॥

---

১ বাড়িয়া, ২ চটির, হোটেলখানার, ৩ জনমজুরের ৪ অতি নিকটে।

আট চালা চৌচালা ঘর বানধিয়া সুন্দর।  
ভালা কইরা বাশ্বে বিনোদ বার-দুয়াইরা ঘর ॥  
শীতল পাটী দিয়া বিনোদ ঘরের দিল বেড়া।  
উলুছনে ছাইল চাল দেখতে মনহরা ॥  
ঝাপে ঝুপে করে বিনোদ কামলার কাম।  
দেখিতে সুন্দর বাড়ী চান্দের সমান ॥  
মাছুয়াপক্ষীর পাখ দিয়া সাজুয়া<sup>১</sup> বানায়।  
কামলা ডাকিয়া বিনোদ পুস্কুনি কাটায় ॥  
বাড়ীর সামনে পুস্কুনি জলে টলমল।  
এক মায়ের এক পুত পরানের সঞ্চল ॥  
পাড়াপড়সি কয় মাও বড় ভাগ্যবতী।  
এক পুতের বরাতে তার দুয়ারে বাশ্ধা হাতী ॥  
এক পুতের গুণে তার লক্ষ্মী বাশ্ধা ঘরে।  
ধনসম্পদ হইল তার দেবতার বরে ॥

(১০)

## বিবাহ

এরে শুন্যা হিরাধর কোন কাম করিল।  
কন্যার বিয়ার লাইগ্যা ভাটুয়া<sup>২</sup> পাঠাইল ॥  
ভাটুয়া আসিয়া কয় বিনোদের মার আগে।  
কন্যা বিয়া করাও তুমি সমুখের মাঘে ॥  
কথাবার্তা হইল স্থির না রইল বাকী।  
গণক ডাকাইয়া বাপে দেখে পাঞ্জিপুঁথি ॥  
পাঞ্জিপুঁথি দেখ্যা গণক বিয়ার লগ্ন করে।  
চল্যা গিয়া হইব বিয়া স্বশুরের ঘরে ॥

---

<sup>১</sup> সাজসজ্জা, <sup>২</sup> ভাট; ঘটক।

ঠাটঠমকে বিনোদ হইল আগুসার <sup>১</sup> ।  
 ঘোড়ার উপরে বিনোদ হইল সোয়ার ॥  
 আগে পাছে বাদ্য বাজে ঢোলডগর ।  
 বরযাত্রী হইল যত পাড়ার নাগর <sup>২</sup> ॥  
 হাঐ খিলাই <sup>৩</sup> ছাড়ে আর তুমরি শত শত ।  
 বাদ্যভাঙ লইয়া চলে রুসনাই <sup>৪</sup> করি পথ ॥  
 উপস্থিত হইল লোক হীরাধরের বাড়ী ।  
 অর্গা পুছ্যা <sup>৫</sup> চান্দ বিনোদ নিল যত নারী ॥  
 জয়াদি <sup>৬</sup> জুকার <sup>৭</sup> দেয় কত ঝাড়ে ঝাড় ।  
 গীতবাদ্য করে যত নারী চমৎকার ॥  
 তবেত মলুয়ার মাও খুড়ীজেঠী লইয়া ।  
 সোহাগ মাগিতে <sup>৮</sup> মাও বিয়ার মঞ্জল চাইয়া ॥  
 খুড়ীর সোহাগ জেঠীর সোহাগ আর মাসীপিসী ।  
 সোহাগ মাগে কন্যার মাও মঞ্জল উদ্দেশি ॥  
 শ্বশুরবাড়ী গিয়া কন্যা থাকুক সোহাগে ।  
 তেকারণে কন্যার মাও ভাল সোহাগ মাগে ॥  
 মাথায় লক্ষ্মীর কুলা অঙলে ঘুড়িয়া <sup>৯</sup> ।  
 সোহাগ মাগিল মায়ে বাড়ী বাড়ী গিয়া ॥  
 উত্তম সাইলের চাউলে পিঠালী বাটিয়া ।  
 বন্দনা করিল আগে তিন আবা <sup>১০</sup> দিয়া ॥  
 চিমঠিয়া <sup>১১</sup> তুলে দুয়ারের মাটী ।  
 সোহাগের দ্রব্য আনি দেয় কুটি কুটি ॥

---

<sup>১</sup> , অগ্রসর, <sup>২</sup> যুবকবৃন্দ, <sup>৩</sup> একরূপ বাজি, <sup>৪</sup> আলো, <sup>৫</sup> অর্ঘ্য দিয়া মুছিয়া, বরণ করিয়া, <sup>৬</sup> জয় দেওয়া প্রভৃতি, <sup>৭</sup> জোকার (জয়-জয়কার শব্দ হইতে), <sup>৮</sup> ভালবাসা চাওয়া, এখনও পূর্ববঙ্গে কোন কোন স্থানে প্রচলিত আছে, মেয়ের মঞ্জলের জন্য আত্মীয় ও পাড়পড়শীদের আশীর্বাদ চাওয়া, <sup>৯</sup> লক্ষ্মীর কুলা মাথায় করিয়া তাহা অঙল দিয়া ঘিরিয়া, <sup>১০</sup> ঠোট হাত দিয়া আঘাত করিয়া ‘আবা’ ‘আবা’ শব্দ করা, <sup>১১</sup> চিমটি দিয়া ।



হলদি চাকি চাকি আর তৈল সিন্দুরে।  
এরে দিয়া সোহাগ ভালা সাজায় সুবিস্তরে <sup>১</sup> ॥  
পাছে পাছে গীত গায় পাড়ার যত নারী।  
সোহাগ মাগিয়া মায় ফিরে নিল বাড়ী ॥  
চুরপানি <sup>২</sup> দিল মাথায় টুপায় <sup>৩</sup> ভরিয়া।  
ধন <sup>৪</sup> মন <sup>৫</sup> ছুয়াইল যতন করিয়া ॥  
ধন ছুয়াইল মায় ধন পাইবার আশে।  
মন ছুয়াইল মায় জামাইর অভিলাষে ॥  
নান্দিমুখ আদি যত শুভ কার্য্য শেষে।  
শুভলগ্নে হইল পরে বিয়া অবশেষে ॥  
পাশা খেলায় চান্দ বিনোদ মলুয়ারে লইয়া।  
পাশায় হারিল বিনোদ চিতের লাগিয়া ॥  
ফুলশয্যা করে বিনোদ রাত্রি হইল শেষ।  
সেই দিন ভাবে বিনোদ ফিরবে নিজের দেশ ॥  
কালরাতে কালক্ষয় যাত্রা করতে মানা।  
এই দিনে জামাই বউয়ে নাহি দেখাশুনা ॥  
কালরাইত গিয়া বিনোদের শুভরাইত আইল  
শয়ানমন্দিরে বিনোদ শয়ান করিল ॥  
ঘরেতে জ্বলিছে বাতি সাজুয়ার তারা <sup>৬</sup>।  
শয়ানমন্দিরে মলুয়া সামনে হইল খাড়া ॥  
নিশিরাইত পইড়া আইল <sup>৭</sup> ঘুমে ঢুলে আখি।  
চিঙে খুশী হইল বিনোদ মলুয়ারে দেখি ॥  
টানিয়া অঙ্গের বাস যতনে শুয়ায় <sup>৮</sup>।  
মাথা হইতে ঘোমটা বিনোদ টানিয়া লামায় ॥

---

<sup>১</sup> ভাল করিয়া, পূর্ণভাবে, <sup>২</sup> চোরা পানি (ত্বী-আচার)—মুম্বয় ঘটে জল ও পাঁচটি ফল এবং অঙ্গুরী লুকাইয়া রাখা হয়, বিবাহের পর বর সেই ঘট হইতে অঙ্গুরী ও ফলাদি বাহির করেন, <sup>৩</sup> মুম্বয় ঘট, <sup>৪</sup> অর্থ, মুদ্রা, <sup>৫</sup> একরূপ গাছের কাঠ, <sup>৬</sup> সাঁজের (সন্ধ্যাকালের) তারা, <sup>৭</sup> গভীর রাত্রি হইল, <sup>৮</sup> শয়ন করায়

কিবা মুখ কিবা সুখ ভুরুর ভঞ্জিমা ।  
আন্ধাইর <sup>১</sup> ঘরেতে যেমন জ্বলে কাণ্ডা সোনা ॥  
এইরূপ দেখিয়া বিনোদ হইল পাগল ।  
চান্দের সমান রূপ করে বলমল ॥  
শিরে না দীঘল কেশ পড়ে কন্যার পায় ।  
সেই কেশ লইয়া বিনোদ মেঘুরী <sup>২</sup> খেলায় ॥  
“কি কর পরাণের বন্ধু শুন মোর কথা ।  
আজি রাতে মানা দেও খাও মোর মাথা ॥  
না ফুটিতে ফুল কেন তুল্যা লও কলি ।  
মধু না আসিতে ফুলে নাহি আসে অলি ॥  
খিধা লাগলে তাপ্তা <sup>৩</sup> ভাত জুড়াইয়া সে খায় ।  
এমন হইতে বন্ধু তোমায় না জুয়ায় ॥  
পঞ্চ ভাইয়ের বউ নিদ্রা নাহি গেছে ।  
বেড়ার ফাক দিয়া তারা তোমায় দেখিছে ॥  
ভূষণের বুণুবুণু শব্দ শুনি কানে ।  
পরিহাস করবে তারা কালিকা বিহানে ॥  
পরদীম <sup>৪</sup> নিবাইয়া বন্ধু আজি কাট নিশি ।  
চিঙে ক্ষেমা দিও বন্ধু না বানাইও দোষী ॥”  
নিবিয়া ঘরের বাতী অন্ধকার হইল ।  
শুভক্ষণ শুভ রাইত পোয়াইয়া গেল ॥  
পবড়াতে উঠিয়া কন্যা বাসি জল দিয়া ।  
হাত পাও বিনোদ পিড়িত বসিয়া ॥

---

<sup>১</sup> অন্ধকার, <sup>২</sup> চুল লইয়া অঞ্জুলী দিয়া একরূপ খেলা, <sup>৩</sup> গরম, <sup>৪</sup> প্রদীপ ।

(১১)

## ঘরে ফেরা

আজি রাত্রে যাইব বিনোদ আপনার বাড়ী।  
সঙ্গেতে করিয়া লইব আপনার নারী ॥  
মায়ে কান্দে বাপে বান্দে কান্দে মাসীপিসী।  
পরের ঘর যায় ঝি কান্দে পাড়াপড়সি ॥  
“পরের লাগ্যা পাল্যা <sup>১</sup> অত করিলাম বড়।  
আমরারে <sup>২</sup> ছাড়িয়া মাও যাইবা পরের ঘর ॥”  
ডাক ছাড়া কান্দে বাপে বিলাপ করে মায়।  
“আজি হইতে কন্যা আমার পরের ঘরে যায় ॥”  
বিলাপ নাই সে কর মাও ছাড়হ কান্দন।  
কি কি দ্রব্য দিবা সঙ্গে করহ সাজন ॥  
ঝাইল <sup>৩</sup> পাটেরা দিল সঙ্গেতে করিয়া।  
সজ মসলা দিল থলিতে ভরিয়া ॥  
আরও সঙ্গে দিল মাও চিকনের চাইল।  
তৈলসিন্দুর দিল খৈয়া বিমির ধান ॥  
“বড় দুঃখু পাইছ মাগো থাক্যা আমার বাড়ী।  
এই জন্মের লাগ্যা যাইবা অভাগী মায় ছাড়ি ॥  
ভালা কইরা থাক্য <sup>৪</sup> মাও শ্বশুরের ঘরে।  
পাড়াপড়সি যাতে মন্দ না কহিতে পারে ॥”  
দধি ভোজন করি বিনোদ যাত্রা যে করিল।  
শ্বশুর-শাশুড়ীর পায় পন্নাম করিল ॥  
জেঠাখুড়া গুরুজনে পরনাম জানায়।  
বিয়া কইরা চান্দ বিনোব আপন ঘরে যায় ॥  
“কি কর বিনোদের মাও গিরেতে বসিয়া।  
তোমার পুত্র বিনোদ আইছে রইদ্রেতে ঘামিয়া ॥

---

<sup>১</sup> পালিয়া, <sup>২</sup> আমাদেরে, <sup>৩</sup> ঝালি; ঝাঁপি, <sup>৪</sup> থাকিও।

কি কর বিনোদের মাসী ঘরেতে বসিয়া ।  
তোমার চান্দ বিনোদ আসে নয়া বউ লইয়া ॥  
কি কর বিনোদের মাসী বৈস্যা তুমি ঘরে ।  
সোনার ছত্র আন্যা ধর চান্দ বিনোদের শিরে ॥”  
ধানদুর্বা দিয়া পরে আর্ঘিয়া পুছিয়া ।  
চান্দ মুখ লইল মায়ে মুছিয়া মুছিয়া ॥  
মায়ের চরণ বন্দ্যা যাদু লইয়া পায়ের ধুলা ।  
পথে আইতে চান্দ মুখ হইয়াছে কালা ॥  
বউগড়া <sup>১</sup> লইল মায় পিড়িতে বসিয়া ।  
ঘরের লক্ষ্মী ঘরে মায় লইল তুলিয়া ॥  
জয়াদি জুকার দেয় পাড়ার যত নারী ।  
রাখিল মঙ্গলঘট গঙ্গাজলে ভরি ॥  
সোনারূপা দিয়া সবে বউয়ের মুখ দেখে ।  
খুড়ী মাসী জেঠি যত সবে একে একে ॥  
এই মতে হইল যত মঙ্গল আচার ।  
এই মত মায়ের সুখ হইল অপার ॥  
বাড়ীর শোভা বাগবাগিচা ঘরের শোভা বেড়া ।  
কুলের <sup>২</sup> শোভা বউ — শাশুড়ীর বুক জুড়া <sup>৩</sup> ॥  
বউ পাইয়া বিনোদের মা পরম সুখী হইল ।  
ঘরগিরস্থি যত সব যতনে পাতিল ॥

(১২)  
কাজীর বিচার

পরে হইল কিবা শুন দিয়া মন ।  
লুচা দুষমন কাজী কৈল বিড়ম্বন ॥

---

<sup>১</sup> বউটিকে, <sup>২</sup> কোলের, <sup>৩</sup> জোড়া ।

বড়ই দুরন্ত কাজী ক্ষেমতা অপার।  
চোরে আশ্রা<sup>১</sup> দিয়া মিয়া সাউদে<sup>২</sup> দেয় কার<sup>৩</sup> ॥  
ভালমন্দ নাহি জানে বিচার আচার।  
কুলের বধু বাহির করে অতি দুরাচার ॥  
একদিন দুশমন কাজী পথে আনাগুনি।  
জল ভরিতে ঘাটে যায় বিনোদের কামিনী ॥  
দেখিয়া সুন্দর নারী পাগল হইল।  
ঘোড়াতে সোয়ার কাজী চাহিয়া রহিল ॥  
ভুঁয়েতে বাইয়া<sup>৪</sup> তার পরে লম্বা চুল।  
সুন্দর বদন যেমন মহুয়ার ফুল ॥  
আখির ফাঁকেতে<sup>৫</sup> তার নাচয়ে খঞ্জন।  
এরে দেখ্যা নিভি নিভি কাজীর আনাগুনা ॥  
আনাগুনা কইরা কাজী হইল বাউরা<sup>৬</sup>।  
রাখিতে না পারে মন করে পংক্ষী উড়া<sup>৭</sup> ॥  
ভাবিয়া চিন্তিয়া কাজী কোন কাম করে।  
একবারে বসে গিয়া কুটুনির<sup>৮</sup> ঘরে ॥  
গেরামে আছিল দুষ্ট নেতাই কুটুনি।  
তার স্বভাবের কথা কিছু লও শুনি ॥  
বয়সেতে বেশ্যামতি কত পতি ধরে।  
বয়স হারাইয়া এখন বসিয়াছে ঘরে ॥  
বয়স হারাইয়া তবু স্বভাব না যায়।  
কুমন্ত্রণা দিয়া কত কামিনী মজায় ॥  
চুল পাকিয়াছে তার পড়িয়াছে দাত।  
এতেক করিয়া এখন জুটায় পেটের ভাত ॥

---

১ আশ্রয়, ২ সাধুরে, ৩ কারাবাস, ৪ বাহিয়া, ৫ অবকাশে, ৬  
পাগল, ৭ পাখী যেরূপ হাত হইতে উড়িয়া যায়, তাহার মন  
সেরূপ হইল, ৮ কুটনী।

কাজীরে দেখিয়া বুড়ি কোন কাম করে।  
কাঠালের পিড়ি দিল বৈসনের তরে ॥  
“কিসের লাগ্যা আইছুইন<sup>১</sup> আইজ দুয়ারে আমার।  
কোন জন্মের ভাগ্যি মোর নাহি জানি তার ॥”  
কাজী কয় “কুটুনিলো তরে দিবাম সোনা।  
করিবা আমার কাজ হইয়া সামিনা<sup>২</sup> ॥  
সাতখুন মাপ তোমার আমার বিচারে।  
এই কাম করলে তোমার কপাল যাইব ফিরে ॥  
যেমন কইরা ঘোড়া বনে ছোট্টা খায়।  
তেমন কইরা বেড়াইবা না গঠিব<sup>৩</sup> দায় ॥  
ছনেতে বান্ধিয়া দিব তোমার ঘরখানি।  
ধনদৌলত যোগাইবাম যাহা লাগে আমি ॥  
পর গেরামেতে যাইতে পথে আনাগুনি<sup>৪</sup>।  
জলের ঘাটে দেখলাম এক সুন্দর কামিনী ॥  
পরিচয়-কথা তার শুন দিয়া মন।  
চান্দ বিনোদ সে যে আমার দুঃমন ॥  
দেশেতে ভমরা নাই কি করি উপায়।  
গোলাপের মধু তায় গোবরিয়া<sup>৫</sup> খায় ॥  
ছুতানাতা ধইরা তুমি যাও তার বাড়ী।  
একলা পাইবা যখন সেই ত সুন্দরী ॥  
আমার মনের কথা কইও তার আগে।  
ধনদৌলত তার সুবিস্তর লাগে<sup>৬</sup> ॥  
তরায় গাথিয়া তার দিয়াম গলার মালা।  
দেখিয়া তাহার রূপ হইয়াছি পাগলা ॥

---

১ আসিয়াছেন, ২ সাবধান, ৩ ঘটিবে, ৪ ভিন্ন গ্রামে যাইবার জন্য আমি পথে চলাফেরা করিতেছিলাম, ৫ গোবরা পোকা (“কে শিখাল তোরে এই বিদ্যে, গোবরা পোকা হয়ে বসিলি পদ্মে, থাক্ থাক্ থাক্, হয়ে দাঁড়কাক, ঠোকর দিলি শিবনৈবদ্যে।” গোপাল উড়ে), ৬ তার জন্য খুব ভাল করিয়া ব্যবস্থা করিব।

নিখা যদি করে মোরে ভাল মত চাইয়া ।  
আমার ঘরের যত নারী রইব বান্দি হইয়া ॥  
সোনা দিয়া বেইরা দিবাম সর্বাঙ্গ শরীর ।  
সাতখুন মাপ তার বিচারে কাজীর ॥  
সোনার পালঙ্ক দিবাম সাজুয়া <sup>1</sup> বিছান ।  
গলায় গাথিয়া দিবাম মোহরের থান ॥  
দিবাম কাঁকের কলসী সোনাতে বান্দিয়া ।  
নাকের বেসর দিবাম তায় হীরায় গড়িয়া ॥”  
এতেক বলিয়া কাজী নিজ ঘরে যায় ।  
এই দিকে কুটুনি মাগি চিন্তয়ে উপায় ॥  
ভাবিয়া চিন্তিয়া নেতাই যায় বিনোদের বাড়ী ।  
তিন ডাক মারে তারে নষ্টা দুষ্টা বুড়ি ॥  
“কি কর বিনোদের মা কি কর বসিয়া ।  
অনেক দিনে আইলাম বাড়ীত তোমারে চাহিয়া <sup>2</sup> ॥  
শুনিয়াছি নয়া বউ আনিয়াছ ঘরে ।  
এই মত সুন্দর নারী নাহিক সহরে ॥  
চক্ষে নাই সে দেখি আমি কানে নাই সে শুনি ।  
কিমত তোমার বউ দেখাও সেয়ানী ॥”  
এই মত নিতি নিতি আনাগুনি করে ।  
এক দিন একলা ঘাটে পাইল মলুয়ারে ॥  
কাজীর যতেক কথা তাহারে জানায় ।  
একে একে কথা সব কহে মলুয়ারে ॥  
“তুমিত ঘরের বধু অঙ্গ কাটা সোনা ।  
রইয়া শুন আমার কথা কিঞ্চিৎ নমুনা ॥  
বিচারে মালীক কাজী দেশের পরধান ।  
কইবাম তার সকল কথা না করিবাম আন <sup>3</sup> ॥

---

1 সাজ-সজ্জাযুক্ত, 2 লাগিয়া, 3 অন্যথা করিব না ।

তোমার রূপ দেখ্যা কাজী হইয়াছে ফানা <sup>১</sup>।  
অঙ্গ ভরিয়া তোমায় দিব কাণ্ডা সোনা ॥  
নিখা যদি কর তারে ভাল মত চাইয়া <sup>২</sup>।  
তার ঘরের যত নারী রইব বান্দি হইয়া ॥  
সোনা দিয়া বেইরা দিব সৰ্বঙ্গ শরীর।  
সাতখুন মাপ তোমার বিচারে কাজীর ॥  
সোনার পালঙ্ক দিব সাজুয়া বিছান।  
গলায় গাথিয়া দিব মোহরের থান ॥  
দিব যে কাঁকের কলসী সোনাতে বান্ধিয়া।  
নাকের বেসর দিব হীরায় গড়িয়া ॥”  
ভয় পাইয়া কন্যা কাঁকের কলসী ভরে।  
একবারে চলে কন্যা আপনার ঘরে ॥  
মনের কথা জান্তে না দেয় পাছে পাছে যায়।  
শাশুড়ী ঘরেতে নাই না দেখে উপায় ॥  
আর বার কথার ফাঁদ ফাদিল কুটুনি।  
রেষিয়া কহিল মলুয়া, “শুনলো কুটুনি ॥  
স্বামী মোর ঘরে নাই কি বলিবাম তরে।  
থাকিলে মারিতাম ঝাটা তর পাকনা <sup>৩</sup> শিরে ॥  
বয়স গিয়াছে তর মরবি আজিকালি।  
লোকের দুষমন তুই দুই চক্ষের বালি ॥  
কুল বেচ্যা খাইছ তুমি বয়সের কালে।  
সেই মত দেখ বুঝি নাগরিয়া <sup>৪</sup> সকলে ॥  
কাজীরে কহিও কথা নাহি চাই <sup>৫</sup> আমি।  
রাজার দোসর <sup>৬</sup> সেই আমার সোয়ামী ॥  
আমার সোয়ামী সে যে পৰ্ব্বতের চুড়া।  
আমার সোয়ামী যেমন রণ-দৌড়ের ঘোড়া <sup>৭</sup> ॥

---

১ পাগল, ২ বিবেচনা করিয়া, ৩ পঞ্চকেশযুক্ত, ৪ নগরের স্ত্রীলোক,  
৫ শুনিতে চাই, ৬ তুল্য, ৭ রণক্ষেত্রে যে ঘোড়া বিপক্ষকে দলন  
করিতে ছুটিয়া যায়।



আমার সোয়ামী যেমন আসমানের চান <sup>1</sup> ।  
না হয় দুষমন কাজী নউখের <sup>2</sup> সমান ॥  
অপমান্যা <sup>3</sup> বুড়ি তুমি যাও নিজের বাড়ী ।  
কাজীরে কহিও কথা সব সবিস্তারি ॥  
দুষমন কুকুর কাজী পাপে দিল মন ।  
ঝাটার বাড়ী দিয়া তারে করতাম বিরম্বন ॥  
বাচ্যা থাকুন সোয়ামী আমার লক্ষ পরমাই পাইয়া ।  
থানের মোহর ভাঙ্গি কাজীর পায়ের লাথি দিয়া ॥  
আমার স্বামী কাণ্ডাসোনা অঙলের ধন ।  
তার সঙ্গে কাজীর সোনার না হয় তুলন ॥  
জাতে মুসলমান কাজী তার ঘরের নারী ।  
মনের আপছুস মিটাক তারা সাত নিখা করি ॥ <sup>4</sup>  
সেই মতে আমারে যে ভাব্যাছে লম্পটা ।  
কাজীরে জানাইও তার মুখে মারি ঝাটা ॥  
বয়সেতে বুড়া তুই মা-বাপের বড় ।  
তে কারণে ছাড়িলাম যাও নিজ ঘর ॥”  
অপমান পাইয়া তবে নেতাই কুটুনি ।  
সকল কথা কয় তবে কাজীর সামনি <sup>5</sup> ॥  
শুনিয়া দুষমন কাজী গুসা <sup>6</sup> যে হইল ।  
পরতিশোধ দিতে তবে সল্লা <sup>7</sup> যে আটিল ॥  
বিনোদের উপরে কাজী পরণা <sup>8</sup> জারি করে ।  
হুকুম লিখিয়া দিল পরণা উপরে ॥  
“সাদি কইরাছ তুমি গেছে ছয়মাস ।  
নজর মরেচা <sup>9</sup> রইছে তোমার অপরকাশ<sup>10</sup> ॥

---

<sup>1</sup> চাঁদ, <sup>2</sup> নখের, <sup>3</sup> অপমানকারী, <sup>4</sup> তাহারা সাতবার নিখা করিয়া তাহাদের মনের আপশোষ মিটাক, <sup>5</sup> সামনে, <sup>6</sup> গোসা (রাগান্বিত), <sup>7</sup> কুপরামর্শ, <sup>8</sup> পরওয়ানা <sup>9</sup> বিবাহের সময় দেওয়ানকে নজর দিতে হইত, এই নজরের নাম “নজর মরেচা”, <sup>10</sup> অপ্রকাশ, তুমি দিয়েছ এরূপ প্রকাশ নাই—অর্থাৎ দেও নাই।

আজি হইতে হুগা মধ্যে আমার বিচারে।  
নজর মরেচা তুমি দিবা দেওয়ানেরে ॥  
নজর মরেচা যদি নাহি দেও তুমি।  
বাজেগু হইব তোমার যত বাড়ী জমী ॥”  
পরগা হইল জারি বিনোদের উপরে।  
ভাব্যা নাহি পায় বিনোদ কোন কাম করে ॥  
পঞ্চশত রূপ্যা <sup>1</sup> সে যে কমবেশী নয়।  
কোথায় পাইব বিনোদ ভাবয়ে চিন্তয় ॥  
ফানা <sup>2</sup> বেকরার <sup>3</sup> হইয়া ভাবিয়া চিন্তিয়া।  
এই মতে হুগা কাল গেল যে চলিয়া ॥  
আর বার পরগা কাজী জাহীর করিয়া।  
বাজেগু করিল জমী ঝাণ্ডা গারি <sup>4</sup> দিয়া ॥  
সুখেতে আছিল বিনোদ কপালের ফেরে।  
আসমান ভাঙ্গিয়া পড় মাথার উপরে ॥  
ঘরের ধান ফুরাইয়া দুঃখেতে পড়িল।  
হালের বলদ বেচ্যা কিন্যা বিনোদ খাইল ॥  
দুধের গাই বেচ্যা খাইল ভাবিয়া চিন্তিয়া।  
বিনোদের মাও কান্দে মাথা থাপাইয়া <sup>5</sup> ॥  
রঙ্গিনা <sup>6</sup> আটচালা ঘর তাও বেচ্যা খাইল।  
একখানি ঘর মাত্র বাড়ীতে রহিল ॥  
সেও খানি বেচে কিনা ভাবে মনে মন।  
“গাছের তলাতে রইবাম করিয়া শয়ন ॥  
আমি রইলাম গাছের তলায় তাতে ক্ষতি নাই।  
প্রাণের দোসর মলুয়ারে রাখি কোন ঠাই ॥  
বুড়াকালে মাও মোর বড় পাইল দুখ।  
উবাসে কাবাসে তার শুখাইল মুখ ॥”

---

<sup>1</sup> রৌপ্যমুদ্রা, <sup>2</sup> উম্মাদবৎ, <sup>3</sup> অস্থিরচিহ্ন; চন্দ্রকুমারের মতে ‘বেইস’, <sup>4</sup> বংশদণ্ড পুতিয়া, <sup>5</sup> থাবরাইয়া, <sup>6</sup> কারুকাক্যে সজ্জিত।

এক দিন কয় বিনোদ মলুয়ারে চাইয়া <sup>১</sup>।  
 “বাপের বাড়ীতে যাও তুমি মায়েরে লইয়া ॥  
 পঞ্চ ভাইয়ের বইন তুমি দুঃখ নাহি জান।  
 ফুলছিটকি <sup>২</sup> নাহি সয় তোমার পরাণ ॥  
 ভালা কাপড় ভালা চোপর উবাস <sup>৩</sup> নাহি জান।  
 কেমন কইরা অত দুঃখ সহিবে পরাণ ॥  
 মাও আছে বাপ আছে আছে সোদর ভাই।  
 ভালবাস্যা রইবে তুমি তাহাদের ঠাই ॥  
 কড়ার ভিখারী আমি রইবাম গাছের তলে।  
 অত দুঃখ তোমার নাহি সহিবে শরীলে ॥”  
 শুনিয়া মলুয়া তবে কহিতে লাগিল।  
 “বাপের বাড়ীর যত সুখ বিয়া হইতেই গেল ॥  
 বনে থাক ছনে থাক গাছের তলায়।  
 তুমি বিনে মলুয়ার নাহিক উপায় ॥  
 সাত দিনের উপাস যদি তোমার মুখ চাইয়া।  
 বড় সুখ পাইবাম তোমার চন্মামিতি <sup>৪</sup> খাইয়া ॥  
 রাজার হালে থাকে যদি আমার বাপের বাড়ী।  
 মলুয়া নহেত সেই সুখের আশারী <sup>৫</sup> ॥  
 শাকভাত খাই যদি গাছতলায় থাকি।  
 দিনের শেষে দেখলে মুখ হইবাম সুখি ॥  
 পিরথিমির <sup>৬</sup> সুখ মোর তোমার পায়ের ধূলা।  
 বাপের বাড়ী না যাইবাম আমি ত একেলা ॥”  
 বিদেশ যাইতে বিনোদ মনে কৈল স্থির।  
 এই কথা শুন্যা মলুয়া উতকা <sup>৭</sup> অস্থির ॥  
 “না দিব প্রাণের বন্ধু না দিব ছাড়িয়া।  
 ছাড়িব আভাগ্যা পরাণ উবাস করিয়া ॥  
 আঞ্চল পাতিয়া থাকবাম গাছের তলায়।

---

১ লক্ষ্য করিয়া, ২ ফুলের ঘা (ছিটকি = চাবুক), ৩ উপবাস,  
 ৪ শরীরে, ৫ চরণামৃত, ৬ আশান্বিত, ইচ্ছুক, ৭ পৃথিবীর, ৮  
 উতালা।

বনেতে ঘুরিবাম ঠিক কহিলাম তোমায় ॥”

(১৩)

### নিদারুণ অর্থকষ্ট

নাকের নথ বেচ্যা মলুয়া আষাঢ়মাস খাইল।  
গলার যে মতির মালা তাও বেচ্যা খাইল ॥  
শায়ণমাসেতে মলুয়া খাডু<sup>১</sup> বেচে।  
এত দুঃখ মলুয়ার কপালেতে আছে ॥  
হাতের বাজু বান্ধা দিয়া ভাদ্রমাস যায়।  
পাটের শাড়ী বেচ্যা মলুয়া আশ্বিনমাস খায় ॥  
কানের ফুল বেচ্যা মলুয়া কার্তিক গোয়াইল।  
অঞ্জের যত সোনাদানা সকল বান্ধা দিল ॥  
শতালি<sup>২</sup> অঞ্জের বাস হাতের কঙ্কণ বাকী।  
আর নাহি চলে দিন মুঠি চাউলের থাকী ॥  
ছেড়া কাপড়ে মলুয়ার অঙ্গ নাহি ঢাকে।  
একদিন গেল মলুয়ার দুরন্ত উবাসে ॥  
ঘরে নাই লক্ষ্মীর দানা এক মুইঠ খুদ।  
দিনরাইত বাড়তে আছে মহাজনের সুদ ॥  
শাক সাজনা খাইয়া তবে দুই দিন যায়।  
দেখিয়া সোয়ামীর মুখ বুক ফাট্যা যায় ॥  
আপনি উবাস থাক্যা পরে নাহি কয়।  
সোয়ামী-শাশুড়ীর দুঃখু কত আর সয় ॥  
লাজত মানের ভয় আর নাই রক্ষা<sup>৩</sup>।  
অখন করিবে মাত্র বাড়ী বাড়ী ভিক্ষা ॥  
এরে দেখ্যা চান্দ বিনোদ কোন কাম করিল।  
ঘরের জ্বীর কাছে কিছু ফুইদ<sup>৪</sup> না করিল ॥  
মায়েরে না কইয়া বিনোদ রাত্র নিশাকালে।  
বৈদেশে করিল মেলা পোষমাস্যা দিনে ॥

---

১ মল, ২ একশত তালি, ৩ লাজ এবং মানের ভয় আর রক্ষা  
করা যায় না, ৪ ( স্ফুট ) প্রকাশ।

(১৪)

## অদৃষ্টের ফের

এমন দুঃখু কালে কাজী কোন কাম করে।  
ফিরিয়া পাঠাইল সেই নেতাই কুটুনিরে ॥  
কুটুনি আসিয়া কয় “বড় মাপের ঝি।  
পরের লাগ্যা দুঃখু কইরা তোমার হইব কি ॥  
কাজীর ঘরে গেলে দাতে কাট্যা <sup>১</sup> খাইবা সোনা।  
উপাস করিয়া কেন হও ক্ষিধায় ফানা ॥  
এই মুইঠ চাউল নাই ঘরেতে তোমার।  
এমন শরীরে দুঃখু কত সহে আর ॥  
ফিরিয়া পাঠাইল কাজী তোমার দোয়ারে <sup>২</sup>।  
মরজি করিয়া তুমি সাদি কর তারে ॥  
ধান ভান সুতা কাট না সাজে তোমায়।  
এমন অঞ্চে ছিড়া কাপড় শোভা নাহি পায় ॥  
নাকেতে বেসর নাই কানে নাই ফুল।  
সর্বাঙ্গ হইয়াছে তোমার ধুতুরার ফুল ॥  
সোনায় জুড়িয়া দিব অঙ্গ যে তোমার।  
কাজীরে করিয়া সাদি ঘরে যাও তার ॥”  
রক্তজবা আখি কন্যা কুটুনিরে কয়।  
“কাটা ঘায়ে লুনের ছিটা আর কত সয় ॥  
বিদেশে গিয়াছে সোয়ামী বড় পাই তাপ।  
তর মুখ দেখলে কুটুনি মোর বাড়ে পাপ ॥  
আন্ধাইরে কাটিব আমি দুঃখের দিবারাতি।  
কাজীরে কহিও তার মুখে মারি লাথি ॥  
পরের ধান বান্যা খাই এও বড় সুখ <sup>৩</sup>।  
তর কথা শুন্যা আমি পাই বড় দুখ ॥

---

১ কাটিয়া, ২ দুয়ারে, ৩ পরের ধান বানিয়া খাই, ইহাও আমার খুব সুখ।

ভিক্ষা করি খাই যদি দুয়ারে দুয়ারে।  
কড়ার আশা নাহি করি দুশমন কাজীর ধারে ॥  
পঞ্চ ভাই আছে মোর যমের সমান।  
তর যে কাটিব নাক কাজীর কাটব কাণ ॥  
পরানে মারিব তরে মুখ খুবরিয়া।  
বাপের বাড়ী দেই আগে পত্র পাঠাইয়া ॥”  
বৈমুখ হইয়া বুড়ী বাড়িতে ফিরিল।  
কত কষ্ট করে তবু স্বীকুরি <sup>১</sup> না গেল ॥  
সোয়ামী বিদেশ গেছে বাড়ী হইল খালি।  
পাড়াপড়শির যত লোক করে বলাবলি ॥  
এই কথা শুনল যদি মলুয়ার মায়।  
পঞ্চ ভাইয়েরে দিয়া খবর পাঠায় ॥  
সাজ্যা আইল পঞ্চ ভাই বাপের বাড়ী নিতে।  
পঞ্চ ভাইয়ে দেখ্যা মলুয়া লাগিল কান্দিতে ॥  
ভাইয়ে বইনে মিল্যা কান্দে গলা ধরাধরি।  
“এমন দুঃখের কথা কামনে পাশরি ॥  
পঞ্চ ভাইয়ের বইন আছলা <sup>২</sup> বড় আদরের।  
ভাল দেখ্যা দিলাম বিয়া কপালের ফের ॥  
পঞ্চ বউয়ের অঞ্জে নাহি ধরে সোনা।  
তোমার অঞ্জে খালি দেখ্যা হইয়াছি ফানা ॥  
অঞ্জেতে মৈলান <sup>৩</sup> বসন শত জোরা তালি।  
ধূলামাটী লাগ্যা বইনের অঞ্জে হইছে কালি ॥  
খালি ভূমে পইরা <sup>৪</sup> বইন শুইয়া নিদ্রা যায়।  
শীতল পাটী ঘরে দেখ তুল্যা রাখছে মায় ॥  
ঘুমাইতে না পার বইন মশার কামরে।  
আবের পাঞ্জা ঝালুয়াইর <sup>৫</sup> মশাইর টাঙ্গাইল <sup>৬</sup> তোমার ঘরে ॥

---

<sup>১</sup> স্বীকার, <sup>২</sup> ছিলে, <sup>৩</sup> মলিন, <sup>৪</sup> পড়িয়া, <sup>৫</sup> ঝালর যুক্ত, অথবা  
‘ঝালুয়া’ নামক স্থানের, <sup>৬</sup> টাঙ্গানো আছে

ভাত ফালাইয়া ভাত খাও বাপের বাড়ী।  
উবাস কইরাছ বইন শুন্যা দুঃখে মরি ॥  
অত খেজালত আর না টানায় প্রাণে।  
সোয়ারী <sup>1</sup> পাঠাইব বল কালুকা বিয়ানে ॥  
ধানে চাউলে গোলা ভরা কত লোক খায়।  
আমার বইনে উবাস প্রাণে বরদাস্ত না পায় ॥  
বার বছর পালছে মায় কোলেতে করিয়া।  
কড়ার কাম না করছে বইন বাড়ীতে থাকিয়া ॥  
আলুফা <sup>2</sup> জিনিষ যত কেউ না খাইয়া।  
ছোট বইনের লাগ্যা রাখছে ছিকায় তুলিয়া ॥  
এও কথা শুন্যা মাও হইছে পাগলিনী।  
তিন দিন ধর্যা মায় না খায় অন্নপানি ॥  
বাপের বাড়ী না যাও যদি কাইল বিয়ানে তুমি।  
উবাস থাকিয়া মায়ে ত্যজিব পরানি ॥  
ঘরে নাহি জ্বলে জাল <sup>3</sup> সন্ধ্যাকালে বাতি।  
তেরাত্র কান্দিয়া মাও পোহাইয়াছে রাতি ॥”  
পঞ্চ ভাইয়ের গলা ধইরা কান্দিয়ে সুন্দরী।  
“কি কহিবাম দুঃখের কথা কইতে নাহি পারি ॥  
ভালা ঘরে দিছলা বিয়া ভালা বরের কাছে।  
কেমনে খণ্ডাইবা দুঃখ কপালে যা আছে ॥  
শ্বশুরবাড়ীত থাকবাম আমি করিয়াছি মন।  
সেইত আমার গয়া-কাশী সেইত বৃন্দাবন ॥  
মা-বাপের সেবা কর তোমরা পঞ্চ ভাই।  
শাশুড়ীর সেবা কইরা ধর্ম আমি চাই ॥  
ঘরেতে আছয়ে বুড়া থইয়া <sup>4</sup> কেমনে যাইবাম।  
মায়েরে কহিও আমি সেইখান না থাকবাম ॥

---

<sup>1</sup> পাল্কি বা ডুলি, <sup>2</sup> দুপ্রাপ্য, <sup>3</sup> (জ্বাল) উনুনের আগুন

<sup>4</sup> থুইয়া

পঞ্চ ভাইয়ের বউ আছে দেখ্যা তারার মুখ।  
কিছু ত মায়ের তবু ঠাণ্ডা রইব বুক ॥  
বুড়া শ্বশুড়ী আমার পুত্র নাই ঘরে।  
কি দেখ্যা মায়ের কণ্ড এই দুঃখু পাশরে ॥”  
এই কথা শুনিয়া তবে তার পাঁচ ভাই।  
জানাইল সকল কথা বাপ-মায়ের ঠাই ॥  
সুতা কাটে ধান ভানে শ্বশুড়ীরে লইয়া।  
এই মতে দিন কাটে দুঃখু যে পাইয়া ॥  
মাঘ-ফাল্গুন গেল মলুয়ার ভাবিয়া চিন্তিয়া।  
চৈত্র-বৈশাখ গেল আশায় রহিয়া ॥  
জৈষ্ঠ্যমাস আম পাকে কাউয়ায় <sup>১</sup> করে রাও।  
কোন বা দেশে আছে বন্ধু নাহি জানে তাও ॥  
আইল আষাঢ়মাস মেঘের বয় ধারা।  
সোয়ামীর চান্দ মুখ না যায় পাশরা ॥  
মেঘ ডাকে গুরু গুরু দেওয়ায় ডাকে রইয়া।  
সোয়ামীর কথা ভাবে খালি ঘরে শুইয়া ॥  
শায়ন মাসেতে লোকে পুজে মনসা।  
এই মাসে আইব সোয়ামী মনে বড় আশা ॥  
শায়ন গেল ভাদ্র গেল আশ্বিন মাস যায়।  
দুর্গাপূজা আইল <sup>২</sup> দেশে শব্দে শূনা যায় ॥  
মনের দুঃখ মনে রইল আশ্বিন মাস গেল।  
পূজার কালেতে সোয়ামী ঘর না আসিল ॥  
যার ঘরে পুত্র নাই তার কত দুঃখ।  
পূজার উচ্ছবে <sup>৩</sup> তার পরাণে নাই সুখ ॥  
কার্তিক মাসেতে বিনোদ বিদেশ কামাইয়া <sup>৪</sup>।  
ঘরেতে আইল বিনোদ মায়েরে ডাকিয়া ॥  
দিন নাই রাইত নাই মায়ের আখি ঝুড়ে।  
মা বলিয়া কে ডাকল আইজ দুঃখিনী মায়েরে ॥

---

১ কাক, ২ আসিল, ৩ উৎসবে, ৪ অর্জন করিয়া



কামাইর টাকা দিয়া বিনোদ নজর আদি দিল।  
বাজেপ্ত<sup>১</sup> আছিল জমী খালাস হইল ॥  
আটচালা বান্ধিল বিনোদ যতন করিয়া।  
হরষিতে শুল্লি বিনোদ মলুয়ারে লইয়া ॥  
বিরহ-বিচ্ছেদের কথা দুঃখের কাহিনী।  
একে একে বিনোদেরে শুনায় কামিনী ॥  
মেওয়া মিশ্রি সকল মিঠা মিঠা গুজাল।  
তার থাক্যা মিঠা দেখ শীতল ডাবের জল ॥  
থার থাক্যা মিঠা দেখ দুঃখের পরে সুখ।  
তার থাক্যা মিঠা যখন ভরে খালি বুক ॥  
তার থাক্যা মিঠা যদি পায় হারানো ধন।  
সকল থাক্যা অধিক মিঠা বিরহে মিলন ॥

(১৫)

### দুরন্ত সমস্যা

এই মতে সুখে দুঃখে দিন বইয়া যায়।  
অপরেতে হইল কিবা শূন সমুদায় ॥  
দুরন্ত দুঃখমন কাজী কোন কাম করে।  
সল্লা করিয়া বিনোদেরে ফালাইল ফেরে ॥  
পরণা করিল জারি বিনোদের উপর।  
“পরমা সন্দর নারী আছে তোমার ঘর ॥  
সিন্দুকি<sup>২</sup> জানাইল বার্তা দেওয়ান সাবের কাছে।  
পরীর মত নারী এক তোমার ঘরে আছে ॥  
পরণা করলাম জারি তোমার উপর।  
আজি হইতে হুগাকাল দিনের ভিতর ॥

---

১ বাজেপ্ত, যাহা জমিদারকর্তৃক অধিকৃত হইয়াছিল, ২ গুপ্তচর।

তোমার ঘরের নারী দিবা দেওয়ানের কাছে ।  
এতক করিলে তোমার গর্দান যদি বাচে ॥  
হুগা হইলে পার হইবে মরণ ।  
পরগা করিলাম জারী এই বিবরণ ॥”  
হাটুতে পাতিয়া মাথা চিন্তে বিনোদ ঘরে ।  
হরিণা পড়িল যেন বাঘের কামরে ॥  
যমে মাইনসে <sup>1</sup> টানাটানি বিনোদে লইয়া ।  
দারুণ বিধাতা দিছে কপালে লিখিয়া ॥  
হুগা হইলে পার পেয়াদা মির্দ আসি ।  
ধরিয়া বাধিয়া বিনোদের গলায় দিল ফাঁসী ॥  
বিনোদেরে ধইর্যা নেয় কাজীর বরাতে <sup>2</sup> ।  
বিচার করিয়া কাজী লাগিল কহিতে ॥  
“হুকুম তামিল নাই করহ আমার ।  
রাখিছ সুন্দর নারী ঘরে আপনার ॥”  
হুকুম করিল কাজী পেয়াদা পশ্চানে <sup>3</sup> ।  
“বিনোদেরে লইয়া যাও নিরলইক্ষার ময়দানে ॥  
জেতায় <sup>4</sup> রাখিয়া তারে কষরে মাটি দিও ।  
তার ঘরের নারীরে কাড়িয়া আনিও ॥  
জাঙ্গিরপুরে বাস করে দেওয়ান জাহাঙ্গির ।  
তার হাউলীতে <sup>5</sup> নিয়া করিও হাজির ॥”  
হুকুম পাইয়া যত পেয়াদা মির্দাগণ ।  
বিনোদে ধরিয়া ধরিয়া লয় নিরলইক্ষার চর ॥  
বিনোদের মায় কান্দে মাটিতে পড়িয়া ।  
“হায় হায় আমার যাদু গেলরে ছাড়িয়া ॥  
যমে যদি নিত পুত্রে না থাকিত আড়ি ।  
মাইন্যের হাতে প্রাণ কেমনে পাশরি <sup>6</sup> ।

---

1 মানুষে, 2 সম্মুখে, 3 পশ্চাতে, 4 জীবিত অবস্থায়, 5 হাবিলি, প্রাসাদ, বড়লোকের বাড়ী, 6 বিস্মৃত হই।

পিঞ্জরের পাখী মোর হৃদয়ের নলি।  
একেবারে গেল মোর বুক কইর্যা খালি ॥”  
শিয়রে বইস্যা মলুয়া মায়েরে বুঝায়।  
মলুয়ার চক্ষের জলে জমিন ভাইস্যা যায় ॥  
কান্দিয়া কাটিয়া মলুয়া কোন কাম করে।  
পঞ্চ ভাইয়ে লেখে পত্র আড়াই অক্ষরে <sup>1</sup> ॥  
বিনোদে ধরিয়া নিল কাজীর পেয়াদায়।  
কাজীর হুকুম কথা লিখে সমুদায় ॥  
পত্র লিখিয়া মলুয়া কোন কাম করে।  
কোড়ার মুখে দিল পত্র অতি যতন করে ॥  
বহুকালের পালা কোড়া ইসারাতে জানে।  
উইরা গেল সোণার কোড়া ভাইয়ের বিদ্রুমান ॥  
পত্র পইড়্যা পঞ্চ ভাই কোন কাম করে।  
লাঠি-ঝাটা লইয়া যায় নিরলক্ষের চরে ॥  
হারামি কাজীর পেয়াদা কাটিছে কবর।  
পঞ্চ ভাই উপনীত হইল তদন্তর ॥  
লাঠি মাইর্যা বিনোদে আছান <sup>2</sup> করিল।  
মলুয়া বইনের কাছে পাছুরী <sup>3</sup> চলিল ॥  
দেখে বিনোদের মাও মাটিতে পড়িয়া।  
আছাড়ি পাছাড়ি কান্দে পুত্রে ডাকিয়া ॥  
শুন্য ঘর পইড়্যা রইছে নাহিক সুন্দরী।  
রাবণে হরিয়া নিছে শ্রীরামের নারী ॥  
খালি পিজরা পইড়া রইছে উইরা গেছে তোতা।  
নিব্যছে নিশার দীপ কইরা আন্ধাইরতা <sup>4</sup> ॥  
পঞ্চ ভাইয়ে গড়াগড়ি মাটিতে পড়িয়া।  
চান্দ বিনোদে কান্দে মলুয়ারে ডাকিয়া ॥

---

1 অল্প কথায়, ময়নামতীর গান, ধর্মপূজার কথা প্রভৃতিতে  
আমরা “আড়াই অক্ষরের মত্রে”র কথা অনেকবার পাইয়াছি।

2 মুক্ত, 3 পশ্চাৎ, 4 আঁধার।

বুকের পাঞ্জর ভাঙে বিনোদের কান্দনে  
যার অন্তরায় দুঃখ সেই ভাল জানে ॥  
“পইরা রইছে জলের কলসী আছে সব তাই<sup>১</sup>।  
ঘরের শোভা মল্লু আমার কেবল ঘরে নাই ॥  
পইরা রইছে ঘর-দরজা পাটির বিছানা।  
কোন জনে হরিয়া নিছে আমার কাণ্ডা সোনা ॥  
পইরা রইছে বাগ-বাগিচা সকলি আন্থাই।  
কোন বা পথে গেল মল্লুয়া উদ্দিশ না পাই ॥”  
কান্দিয়া কাটিয়া বিনোদ কোন কাম করে।  
হাইরা<sup>২</sup> পিজরার কাছে গিয়া জিজ্ঞাসে কোড়ারে ॥  
“বনের কোড়া মনের কোড়া জন্মকালের ভাই।  
তোমার জন্য যদি আমি মল্লুর উদ্দিশ পাই ॥”  
মায়েরে লইয়া বিনোদ কোড়া সঞ্চে লইল।  
বাড়ীঘর ছাইড়া বিনোদ দেশান্তর হইল ॥

(১৬)

### দেওয়ান সাহেবের হাউলীতে মল্লুয়া

হাউলাতে বসিয়া কান্দে মল্লুয়া সুন্দরী।  
পালঙ্ক ছাড়িয়া বসে জমীন উপরী ॥  
আরাম খানা আরাম পিনা আইন্যাছে বান্দিরা।  
সামনে খাড়া দেওয়ান সাব মাথার দিছে কিরা<sup>৩</sup> ॥  
“আমার মাথা কাও কন্যা আমার মাথা খাও।  
দুখনি করিয়া আর মোরে না ভাবাও ॥

---

১ সকল জিনিষই, ২ হাড়িয়া, হাড়িদের প্রস্তুত? অথবা হাণ্ডীর  
(হাঁড়ির) মত বৃহদাকৃতি, ৩ শপথ।

আরাম খানা খাইয়া বস পালঙ্ক উপরে।  
পিথি/থমীর সুখ আইন্যা দিবাম তোমারে ॥  
দিল্লি হইতে আইন্যা দিবাম অগ্নি-পাটের সাড়ি।  
নাকের বেসর দিবাম তোমায় কাণ্ডা সোণায় গড়ি ॥  
বান্দী দাসী আছে যত লেখাযুখা নাই।  
অনুগত হইয়া তারা মানিবে ফরমাই (স) ॥  
পালঙ্কে বসিয়া তুমি করিবে আরাম।  
জানবে থাকিবে বান্দা হইয়া গোলাম ॥”  
হরিণা পড়িয়া যেমন বাঘের কামড়ে।  
কাইন্দা কাইন্দা কয় মলুয়া দেওয়ানের গোচরে ॥  
“ বার মাসের বর্ষ <sup>1</sup> মোর নয় মাস গেছে।  
পরতিষ্ঠা <sup>2</sup> করিতে আর তিন মাস আছে ॥  
শুন শুন দেওয়ান সাব কহি যে তোমারে।  
পরতিজ্ঞা করহ তুমি আমার গোচরে ॥  
না খাইব উচ্ছিষ্ট না ছুইব পানি।  
এক জ্বালে খাইব অন্ন আলু ও আলুনি ॥  
পালঙ্কে শুইতে মোর দেবের আছে মানা।  
জমিনে শুইব আমি আঁচল বিছানা ॥  
পরটিষ্ঠ <sup>3</sup> করি আমি ব্রত না ভাঙ্গিব।  
পরপুরুষের মুখ কভু না দেখিব ॥  
এই তিন মাস মোর না আইস অন্দরে।  
সময় হইলে গত বলিবাম তোমারে ॥  
এহার অন্যথা হইলে হইবা দুশ্মন।  
বিষ-পানী খাইয়া আমি ত্যজিবাম জীবন।”

---

<sup>1</sup> ব্রত, <sup>2</sup> প্রতিষ্ঠা, <sup>3</sup> প্রায়শ্চিত্ত

এক মাস দুই মাস তিন মাস গেল।  
তিন মাস পরে দেওয়ান কোন কাম করিল ॥  
মুখেতে সুগন্ধি পান অতি ধীরে ধীরে।  
সুনালী<sup>১</sup> রুমাল হাতে দেওয়ান পশিল অন্দরে ॥  
দেওয়ানে দেখিয়া মলুয়া বড় ভয় পাইল।  
বাঘের কামরে যেন হরিণা পড়িল।  
“তিন মাস গেছে কন্যা ভাড়াইয়া আমায়।  
সত্য করিয়াছ কন্যা ভাবিতে যোয়ায়<sup>২</sup> ॥  
জমিন ছাড়িয়া আস পালঙ্ক উপরে।  
অন্তরে হইয়া খুসী ভজহ আমারে ॥  
দিলারাম কন্যা তুমি কর দেল খোস।  
তোমার স্বামীর মুক্ত করব না রইব আপশোষ।”  
কন্যা বলে “কাজী মোরে বড় দুঃখ দিল।  
অবিচার করি মোর সোয়ামীরে মারিল ॥  
কিবা মুক্তি দিবা স্বামীর কি কহিবাম তোমারে।  
জেতায় রাখ্যা কবর দিছে নিরালইক্ষার চরে ॥  
হেন কাজী থাক্তে নহে মনের মিলন।  
যত দুঃখ দিল কাজী না হয় পাশরণ ॥”  
হুকুম করিয়া দেওয়ান কোটালেরে বলে।  
“কাজীরে ধরিয়া শইঘ দেও নিয়া শূলে।”  
পরণা হুকুম লইয়া পেয়াদা মির্দা যায়।  
ঐদিনে মনের দুঃখ মলুয়া মিটায় ॥  
খুসী হইয়া মলুয়া তবে দেওয়ানে কহিল।  
“বার মাসের বার দিন বাকী মাত্র রইল ॥  
এই বার দিন তুমি বারদস্তি করিয়া।  
কোড়া শিকারে যাইতে সাজাও ভাওয়ালিয়া<sup>৩</sup> ॥

---

১ সোনালী, ২ যোগ্য হয়, ৩ বড় নৌকাবিশেষ

জানহ সোয়ামী মোর ভালত শিকারী।  
সদাকাল ঘরে থাকি আমি তার নারী॥  
বিস্তর জানিলাম আমি শিকারের ফন্দি।  
একেবারে শতেক কোড়া করি আমি বন্দি॥”  
দিন ক্ষেণ সুস্থির হইল যাইতে শিকারে।  
হেথায় সুন্দরী কন্যা কোন কাম করে॥  
ভাইয়ের কাছে পত্র লেখে সন্ধান করিয়া।  
যত্ন করি পালা কোড়া দিল উড়াইয়া॥  
পঞ্চ ভাইয়ে পত্র পাইয়া পান্সী নাও করে <sup>১</sup>।  
ছল করিয়া তারা কোড়া শিকার ধরে॥  
বিস্তার <sup>২</sup> ধলাই বিল পদ্মফুলে ভরা।  
কোড়া শিকার করতে দেওয়ান যায় দুপুর বেলা॥  
সঙ্গেতে মলুয়া কন্যা পরমা সুন্দরী।  
পান্সী লইয়া পঞ্চ ভাই লইলেক ঘেরী॥  
লাঠির বাড়ীতে ছিল যত দারী মাঝি।  
উবুত <sup>৩</sup> হইয়া জলে পড়ে করে কাজিমাজি <sup>৪</sup>॥  
পঞ্চ ভাইয়ার পান্সীখানা দেখিতে সুন্দর।  
লক্ষ্য দিয়ে উঠে কন্যা তাহার উপর॥  
আষ্ট দারে মারে টান জ্ঞাতি বন্ধুজনে।  
পঙ্খী উড়া করে পান্সী ভাইগা পদ্মবনে॥  
সোয়ামী সহিত মলুয়া যায় বাপের বাড়ী।  
ছীরাম উদ্ধার করে যেন আপনার নারী॥

---

১ পানসি নৌকা ভাড়া করে, ২ প্রশস্ত, বিস্তৃত, ৩ উপুড়, ৪  
টেঁচামেচি।

(১৭)

## আত্মীয়গণের নিষ্ঠুরতা

এ দিকে হইল কিবা শুন দিয়া মন।  
দুঃখনি করিল যত জ্ঞাতি বন্ধুগণ॥  
কেহ বলে মলুয়া যে হইল অসতী।  
মুসলমানের অন্ন খাইয়া গেল তার জাতি॥  
তিন মাস ছিল মলুয়া দেওয়ান সাবের ঘরে।  
কেমনে রাখিল প্রাণ না জানি কি মতে॥  
বিনদের মামা সে যে জাতিতে কুলীন।  
হালুয়া দাসের গুষ্ঠীর মধ্যে সেই ত প্রবীন॥  
“ভাইগনা <sup>১</sup> বউয়ের হাতের ভাত খাইতে নাহি পারি।  
জাতিতে উঠুক বিনোদ পরাচিড়ি করি॥”  
সম্মুখে বিনোদের পিসা কুলার বড় জাঁক।  
সে কয় “আমার কথা না শুনিলে পাপ॥  
তিন মাস রইল কন্যা দেওয়ান সাহেব ঘরে।  
কি দিয়া রাইখ্যাছে পরান কে কহিতে পারে॥”  
ভাবিয়া চিন্তিয়া বিনোদ কোন কাম করিল।  
ব্রাহ্মণের পাতি <sup>২</sup> দিয়ে পরাচিড়ি করিল॥  
পরাচিড়ি করিয়া বিনোদ ত্যজে ঘরের নারী।  
আন্ধারে লুকাইয়া কান্দে মলুয়া সুন্দরী॥  
“কোথা যাই কারে কই মনের বেদন।  
স্বামীতে <sup>৩</sup> ছাড়িল যদি কি ছাড় জীবন।”  
পঞ্চ ভাইয়ে বলে “বইন না কান্দিও তুমি।  
শীঘ্র কইরা বাপের বাড়ী লইয়া যাইবাম আমি॥  
ভাত-কাপড়ের অভাব নাই চিন্তা না করিও।  
বাপের বাড়ী থাকবা তুমি পরম সুখী হইও॥”

---

<sup>১</sup> ভাগ্নে, <sup>২</sup> ব্যবস্থা, <sup>৩</sup> স্বামী।



বাপে বুঝায় ভাইয়ে না বুঝে সুন্দরী।  
“বাইর কামুলী <sup>১</sup> হইয়া আমি থাকবাম সোয়ামীর বাড়ী ॥  
গোবর ছিডা <sup>২</sup> দিয়াম আমি সকাল-সন্ধ্যাবেলা।  
বাইরের যত কাম আমি করিবাম একালা ॥  
অমজল না নিতে না পারিব আমি।  
ভালা দেইখ্যা বিয়া কর সুন্দরী কামিনী।”  
পঞ্চ ভাইয়েরে মলুয়া কয় মাথার কিরা দিয়া।  
“ভাল দেইখ্যা সোয়ামীরে আগে করাও বিয়া ॥  
বুড়ি শাশুড়ী মোর না দেখে না শুনৈ।  
কেমন কইর্যা কাটবে দিন এমন গুজরাণে <sup>৩</sup> ॥”  
জ্ঞাতি বন্ধু মিলি তবে বিবাহ করায়।  
বাইর কামুলী মলুয়ার মনে দুঃখ নাহি পায় ॥  
বাইর কামুলীর কাম করে মনের সন্তোষে।  
সতীনেরে রাখে কন্যা মনের হরষে ॥  
তথাপি মলুয়া নাহি যায় বাপের বাড়ী।  
যতন করিয়া সেবে সোয়ামী-শাশুড়ী ॥

(১৮)

### মৃতের জীবনপ্রাপ্তি

শুইয়াছিল অভাগী মাও আপনার ঘরে।  
স্বপন দেখিল সে রাত্র নিশাকালে ॥  
ঘুমতে উঠিয়া বিনোদ ভাতের দিল তাড়া।  
অভাগী মায় উইঠ্যা বলে চাউল নাই কাড়া <sup>৪</sup> ॥  
বিনোদ কহিছে মাও শুন মোর কথা।  
“শীগীর কইরা রান্ধ ভাত খাও মোর মাথা ॥

---

<sup>১</sup> বাহিরের দাসী, <sup>২</sup> ছিটা, ছড়া, <sup>৩</sup> অবস্থায়, হালে, <sup>৪</sup> কাঁড়া, ছাঁটা, পরিস্কৃত।

কোড়া-শিকারে আমি যাইবাম দূর স্থানে।  
বিদায় মাগিছি মাও তোমার চরণে॥”  
রাঁধিতে বাড়িতে ভাত দেবী নাহি সয়।  
ঘরে ছিল পানিভাত তাই খাইয়া লয়॥  
পানিভাত খাইয়া বিনোদ পথে মেলা দিল।  
কোড়া-শিকারেতে যাইতে মায়ে পন্নামিল <sup>১</sup> ॥  
ডাইন হাতে হাইর পিজরা বাম হাতে কোড়া।  
দুপইরা কালে বিনোদ পথে দিল মেলা॥  
পথে আছিল বইনের বাড়ী উঠিয়া বসিল।  
ভাইয়েরে দেখিয়া বইন কান্দিতে লাগিল॥  
হেথা হইতে চলে বিনোদ বইনেরে কহিয়া।  
গহিন <sup>২</sup> কাননে গেল কোড়া হাতে লইয়া॥  
দুর্ভিক্ষের মধ্যে বিনোদ কোড়া হালা <sup>৩</sup> দিল।  
হাইরা পিজরা হাতে লইয়া কোড়ারে ছাড়িল॥  
কোড়া না ছারিয়া বিনোদ কোন কাম করিল।  
বন ছোবার <sup>৪</sup> আড়ালে বিনোদ আসিয়া বসিল॥  
ছোবায় ছিল কালসাপ কোন কাম করিল।  
কানি আগুলের মাঝে ছোব যে মারিল॥  
কালকূট বিষ হায়রে উজান ধাইল।  
মস্তকে উঠিল বিষ ঢলিয়া পড়িল॥  
“উইরা যাওরে পশুপাখী কইও মায়ের আগে।  
আমি বিনোদ মারা গেলাম এই জঙ্গলার মাঝে॥  
সাক্ষী হইও চন্দ্রসূর্য্য সাক্ষী হইও তুমি।  
বিনা দোষে কালনাগে দংশিল মোর পরাণী॥  
কোন জনে জানাইব কথা অভাগিনী মায়।  
জন্মের মত না দেখিলাম সুন্দর মলুয়ায়॥

---

১ প্রণাম করিল, ২ গভীর, ৩ ছাড়িয়া, ৪ ঝোপের।

বাড়ীঘর পইরা রইল বেবান্ <sup>১</sup> পান্থরে <sup>২</sup> ।  
বাড়ীঘর থইয়া বিনোদ এইখানে মরে ॥”  
পথেতে পথিক যায় “কোন বা দেশে ঘর ।  
মায়ের কাছে কইও আমার এইনা খবর ॥”  
সন্ধ্যাবেলা খবর দিল পথের পথিকে ।  
“তোমার বিনোদ মারা গেল পড়িয়া বিপাকে ।”  
আউলাইয়া মাথার কেশ পথে মেলা দিল ।  
যেখানে বিনোদ মাও তথায় চলিল ॥  
নাকেতে নিশ্বাস নাই মুখে নাই কথা ।  
ভূমে আছাড় খাইয়া পড়ে অভাগিনী মাতা ॥  
ধরাধরি কইরা সবে বিনোদ আনে বাড়ী ।  
ভূমেতে পড়িয়া কান্দে মলুয়া সুন্দরী ॥  
“হায় প্রভু কোথা গেলা অণ্ডলের ধন ।  
তোমারে ছাড়িয়া কেমনে রাখিবাম জীবন ॥  
তোমারে থইয়া কেন মোরে না খাইল নাগে ।  
বাইর কামুলীরে নাহি খায় জঙ্গলার বাঘে ॥  
বাইরে থাকি বাইর কামুলী বাইরের কাম করি ।  
সোয়ামীর মুখ চাইয়া আমি সকল পাশরি ॥  
সেও সাধে বিধাতা মোর উড়াইল ছাই ।  
জীবন রাখিতে মোর আর ইচ্ছা নাই ॥  
আগুনে পশিব আমি প্রভু কোলে লইয়া ।  
জলেতে ডুবিব আমি সকল ছাড়িয়া ॥  
হিজল গাছের ডালে টাঙাইব ফাঁসী ।  
হাম অভাগী নারী কোন বা দোষের দোষী ।”  
খবর পাইয়া পণ্ড ভাই আসিলেক ধাইয়া ।  
পণ্ড ভাই কান্দে বসি মরা কোলে লইয়া ॥  
মুখের লাল বাইয়া পরে পক্ষের মণি ধুয়া <sup>৩</sup> ।

---

১ অজানা, অনির্দিষ্ট, ২ প্রান্তরে, ৩ ঘোলা ॥

“কেমন কইরা কাটাইলে আমাদের মায়া ॥  
পঞ্চ ভাইয়ের বইনে সইপ্যা দিলাম তোমার করে।  
রাড়ী হইয়া বইন আমার কেমনে থাকবে ঘরে ॥  
তিন দোষে দোষী বইন সেও ছিল ভাল।  
রাড়ী হইয়া সইব কেমনে কালবিশের জ্বালা ॥  
হাতেতে সোণার শঙ্ক কেমনে ভাঙ্গিব।  
দুঃখের বদন বইনের কেমনে দেখিব ॥  
“না কাইন্দ না কাইন্দ ভাই আমার কথা শুন।  
পরীখাইয়া <sup>১</sup> দেখি একবার আছে কিনা প্রাণ।  
ঘাটেতে আছে বাঁধা ঐ মন পবনের নাও।  
শীঘ্র লইয়া তরে ওঝার বাড়ী যাও।”  
পাচ ভাইয়ে পাচ দাড় নায়েতে উঠিল।  
মরা স্বামী কোলে লইয়া মলুয়া বসিল ॥  
গাড়রী <sup>২</sup> ওঝার বাড়ী সাত দিননের আড়ি <sup>৩</sup>।  
এক দিনে গেল মলুয়া গাড়রীর বাড়ী ॥  
নাকমুখ দেইখ্যা ওঝা মাথায় থাপা <sup>৪</sup> দিল।  
বুকেতে আনিয়া বিষ কোমরে নামাইল ॥  
কোমরে আনিয়া বিষ হাটুতে নামাইল।  
হাটুতে আনিয়া বিষ পায়ে নামাইল ॥  
পাতালেতে কালনাগ চুমকে লইল।  
যখানে নাগিনী বিষ চুমকে <sup>৫</sup> লইল ॥  
বিষজ্বালা গেল বিনোদ আখি মেইল্যা চাইল।  
পতি জিয়াইয়া সতী ফিইর্যা আইল ঘরে।  
জয় জয় ধনি হইল জুড়িয়া নগরে ॥  
কেউ বলে “বেহুলা জিয়াইল লক্ষ্মীন্দরে।”  
কেউ বলে “সতী কন্যা গেছিল দেবপুরে ॥

---

১ পরীক্ষা করিয়া, ২ ‘গরুড়’ উপাধি সাপের ওঝারা ব্যবহার করিতেন, ৩ পথ, ৪ থাবা, থাপ্রর, ৫ চুমুক দিয়া।

হালুয়া দাসের গোষ্ঠী করিতে উদ্ধার।  
বংশাইয়া <sup>১</sup> সতী কন্যা হইল অবতার ॥  
পান ফুল দিয়া কন্যায় তুইল্যা লও ঘরে।  
সতী কন্যা হইয়া কেন কামুলির কাম করে ॥  
মরা পতি জিয়াইয়া আনে যেই নারী।  
তাহারে সমাজে লইতে কেন দৈমত <sup>২</sup> করি ॥”

(১৯)

### শেষ দৃশ্য

বিনোদের মামা বলে হালুয়ার সরদার।  
“যে ঘরে তুলিয়া লইবে জাতি যাইবে তার।”  
বিনোদের পিশা কয় ভাবিয়া চিন্তিয়া।  
“ঘরেতে না লইব কন্যা জাতিধর্ম ছাড়িয়া।”  
দুঃখিনী দুঃখের কন্যা দুঃখে দিন যায়।  
এত দুঃখ ছিল তার কইতে না যোয়ায় ॥  
শিশু বেলায় বড় সুখ বাপে-ভাইয়ে দিল।  
মায়ের কোলে থাইক্যা কন্যা বড় সুখ পাইল ॥  
মায়ের নয়নতারা নয়নের মণি।  
ফুল ছিটকীর পরি নাহি সহিছে পরাণী ॥  
পাচ ভাইয়ের থাইক্যা <sup>৩</sup> কন্যার ছিল দর <sup>৪</sup>।  
এমন কন্যার দুঃখ না সহে অন্তর ॥  
ভাবিয়া চিন্তিয়া মলুয়া না দেখে উপায়।  
আপনি থাকিতে নাহি স্বামীর দুঃখ যায় ॥  
বদনাম কলঙ্ক যত না যাইব সোয়ামীর।  
পরাণ ত্যজিবে কন্যা মনে কৈল স্থির ॥

১ বংশে আইয়া, এই বংশে আসিয়া, ২ দুইমত, দ্বিধা, ৩ থাকিয়া,

৪ মূল্য, পাঁচ ভাই অপেক্ষা কন্যা প্রিয়তরা ছিল।

ঘাটেতে আছিল বান্ধা মন-পবনের নাও ।  
দুপুরিয়া কালে কন্যা নাওয়ে দিল পাও ॥  
ঝলকে ঝলকে উঠে ভাঙা নাও সে পানি ।  
কতদূরে পাতালপুরি আমি নাহি জানি ॥  
উঠুক উঠুক আরও জল নায়ের বাতা বাইয়া ।  
বিনোদের ভগ্নি আইল জলের ঘাটে ধাইয়া ॥  
“শুন শুন বধু ওগো কইয়া বুঝাই তরে ।  
ভাঙা নাও ছাইড়া তুমি আইস মোদের ঘরে ॥”  
“না যাইব ঘরে আর শুনহে ননদিনী ।  
তোমারা সবার মুখ দেইখ্যা ফাটিছে পরাণী ॥  
উঠুক উঠুক উঠুক পানি ডুবুক ভাঙা নাও ।  
জন্মের মত মলুয়ারে একবার দেইখ্যা যাও ॥  
দৌইড়া আইল শাশুড়ী আউলা মাথার কেশ ।  
বস্ত্র না সঞ্চরে মাও পাগলিনীর বেশ ॥  
“শুন গো পরাণ বধু কইয়া বুঝাই তরে ।  
ঘরের লক্ষ্মী বউ যে আমার ফিইরা আইস ঘরে ॥  
ভাঙা ঘরের চান্দের আলো আন্ধাইর ঘরের বাতি ।  
তোমারে না ছাইড়া থাকিবাম এক দিবারাতি ॥”  
“উঠুক উঠুক উঠুক পানি ডুবুক ভাঙা নাও ।  
বিদায় দেও মা জননী ধরি তোমার পাও ॥”  
ভাঙা নায়ে উঠল পানি করি কল কল ।  
পাড়ে কান্দে হাউড়ী<sup>১</sup> নাও অর্ধেক হইল তল ॥  
একে একে দৌইড়া আইল গর্ভ-সোদর ভাই ।  
জ্ঞাতি বন্ধু আইল যত লেখাযুখা নাই ॥  
পঞ্চ ভাইয়ে ডাইক্যা কয় সোনা বইনের কাছে ।  
“ভাঙা নায়ে উইঠ্যা বইন কোন বা কার্য্য আছে ॥  
বাপের বাড়ী যাইতে সোয়াদ<sup>২</sup> কও সত্য করিয়া ।  
পঞ্চ ভাইয়ে লইয়া যাইব সোনার পান্সী দিয়া ।”

---

<sup>১</sup> শাশুড়ী, <sup>২</sup> অভিপ্রায়, ইচ্ছা সাধ ।

“না যাইবাম না যাইবাম ভাই আর সে বাপের বাড়ী।  
ভাইয়ের কাছে বিদায় মাগে মলুয়া সুন্দরী ॥  
উঠুক উঠুক উঠুক জল ডুবুক ভাঙ্গা নাও।  
মলুয়ারে রাইখ্যা তোমারা আপন ঘরে যাও ॥  
বাতা বাইয়া উঠে পানি ডুবুক ভাঙ্গা নাও।  
মলুয়ারে রাইখ্যা তোমরা আপন ঘরে যাও ॥”  
বাতা বাইয়া উঠে পানি ডুবে ভাঙ্গা নাও।  
“দৌইড়া আস চান্দ বিনোদ দেখতে যদি চাও ॥”  
দৌইড়া আইস্যা চান্দ বিনোদ নদীর পাড়ে খাড়া।  
“এমন কইরা জলে ডুবে আমার নয়নতারা ॥  
চান্দসুরুজ ডুবুক আমার সংসারে কাজ নাই।  
জ্ঞাতি বন্ধু জনে আমি আর ত নাই চাই ॥  
তুমি যদি ডুব কন্যা আমায় সঙ্গে নেও।  
একটিবার মুখে চাইয়া প্রাণের বেদন কও ॥  
ঘরে তুলিয়া লইবাম তোমায় সমাজে কাজ নাই।  
জলে না ডুবিও কন্যা ধর্মের দোহাই ॥”  
“গত হইয়া গেছে দিন আরত নাই বাকী।  
কিসের লাইগ্যা সংসারে কাজ আর বা কেন থাকি ॥  
আমি নারী থাকতে তোমার কলঙ্ক না যাবে।  
জ্ঞাতি বন্ধু জনে তোমায় সদাই ঘাটিবে <sup>১</sup> ॥  
কলঙ্কজীবন মোর ভাসাইব সাগরে।  
এখান হইতে সোয়ামী মোর চইল্যা যাও ঘরে ॥  
ঘরে আছে সুন্দর নারী তার মুখ চাইয়া।  
সুখে কর গির-বাস <sup>২</sup> তাহারে লইয়া ॥  
উঠুক উঠুক উঠুক পানি ডুবুক ভাঙ্গা নাও।  
অভাগীরে রাইখ্যা তুমি আপন ঘরে যাও ॥  
বাতা বাইয়া উঠুক পানি মাইজ-দরিয়ার কোলে ॥”  
জ্ঞাতি বন্ধু জনে কন্যা ডাক দিয়া বলে ॥

---

<sup>১</sup> দোষ কীর্জন করিবে, <sup>২</sup> গৃহ-বাস

“বড় দোষের দোষী যেই সেও যায় চলি।  
খোটা উঠা যত দোষ আমার সকলি।  
কপালে আছিল দুঃখ না যায় খণ্ডনে।  
কোন দোষের দোষী নয় আমার সোয়ামী॥”  
“শুনগো শাশুড়ী মোর শত জন্মের মাও।  
এইখানে থাইক্যা পন্নাম আমি জানাই তোমার পাও॥”  
সুন্দরী মলুয়া কয় সতীনে ডাকিয়া।  
“সুখে কর গির-বাস সোয়ামী লইয়া॥  
আজি হইতে না দেখিবা মলুয়ার মুখ।  
আমার দুঃখ পাশরিবা দেইখ্যা স্বামীর মুখ॥”  
পূবেতে উঠিল বর গর্জিয়া উঠে দেওয়া।  
এই সাগরের কূল নাই ঘাটে নাই খেওয়া॥  
“ডুবুক ডুবুক ডুবুক নাও আর বা কত দূর।  
ডুইব্যা দেখি কতদূরে আছে পাতালপুর॥”  
পূবেতে গর্জিল দেওয়া ছুটল বিষম বাও।  
কইবা গেল সুন্দর কন্যা মন-পবনের নাও॥

---

(দীনেশচন্দ্র সেন-এর ময়মনসিংহ গীতিকা থেকে নেওয়া)

সুদীপ্ত মুখার্জি, ইন্সটিটিউট অফ ফিসিক্স।